

BAHEBERU,

KHAOLO EA BOTŠELELA ³

 Malume hoseng hona, metsoalle. Ke monyetla ho fihla mona. 'Me—'me ho phethisa selelekela sa se tonana se entsoeng ke molisa oa rōna ho hloka bophelo ba sebele ruri, ha ke re? Re boka Morena ka matla a Hae ohle a folisang le ka mehauhelo ea Hae eo A re fileng eona ho theoha le lilemo.

Joale ke tlameha ho etsa litsebiso tse 'maloa. E 'ngoe, rōna, Moena Woods le Moena Roberson, re batla ho le leboha bohole ka ho re rapella, leetong le bolokehileng. Re ile ra nyakalla; ho se ho fetile matsatsi a mane le halofo, kea kholoa, re khutlide ka polokeho. Morena o ile a re sitsa.

⁵⁰⁶ Joale, re tsebisa hore Moena Graham Snelling, tsoselsetso ea hae, e tsoelapele, holimo mono—mono qetellong ea Brigham Avenue, pela...kahara motse mona. 'Me bosiu ba Laboraro le tlang lena...Ke batla ho tsamaea hosane, kamora lepato la eo ke tla mo tsebisa nakoaneng feela. Re tla le tsebisa Laboraro bosiu. Re batla ho tsamaea re le moifo, bohole, ho etela Moena Graham pele a koala tšebeletso ea hae holimo mono. 'Me re tla leka ho teanya kereke eohle 'moho, ha re ka khona, re tlohe re le moifo ho kopana, ho hlola le Moena Graham tšebeletsong ea hae e 'ngoe.

⁵⁰⁷ 'Me, joale, thapama ena koana—koana moahong oa mopatabafu koana Charlestown, ke e—e Mof. Colvin, ea kileng a tsamaea kereke mona lilemong tse ngata tse fetileng, a le lilemo tse mashome a supileng a metso e mene, o siile bophelo bona maobane ho ba le Morena Jesu. 'Me lepato la hae le tla tšoaroa ka Mantaha, ke Mor. Mongh. McKinny, eo pele, khale koana, e neng e le molisa oa kereke ea Methodise koana—koana Port Fulton lilemo tse ngata, e le motsoalle oa bona e moholo. 'Me ke tla mo thusa, ka Mantaha, mane, kea kholoa ke mashome a mararo kamora hora ea pele, mono—mono chape leng ea Charlestown, Indiana. 'Me lona bohole metsoalle ea lelapa la Colvin, kea tseba, ba tla ananel a khotthatso e nyenyane kapa...ho tsukutloa ka letsoho nakoana. Hoba bohole rea tseba ho joang, rōna ba fetileng moo, liphuleng, ka borōna, rea tseba ho joang ho lahleheloa ke motsoalle. 'Me ka hona re...O robetse ka hara—ka hara chapele hona joale, mane Charlestown, Indiana. Ha u ka nyoloha thapama ena, khele, lelapa la Colvin le tla ananel a, kea lumela. Boholo ba batho ba habo ba sa tsamaea mona tabernakeleng. Ke chatisitse,

ke patile, ka kolobetsa, nkare, lelapa la bona, kaofela. 'Me ka hona Mongh. Grayson, e neng e le moahisane oa rōna hantle mono, ke mopatabafu holimo mono.

⁵⁰⁸ E ntano ba sena, bosiung bona, ha Morena a ratile, moo re khaolitseng hoseng hona, re tla leka ho e thonaka bosiung bona, tekolong e kholo ena eo re e kenelang joale. 'Me kea kholoa tseo e ne e le litsebiso, ho latela—latela tsebo ea ka—ka. 'Me bosiu ba Laboraro lena le tlang, joale, re tla tsebisa bosiu boo re tla etela Moena Graham ka bona.

⁵⁰⁹ 'Me re amohela baeti bohle ba menyako ea rōna. Hape re thabetse ho ba le lona mona hoseng hona, le ho rapela Molimo ho le sitsa ka monono, ka ho khaphatseha, kajeno pokanong ena.

⁵¹⁰ Moena Cox o sa tsoa mpolella a re morero o buisanang le batho ha o sebetse ka tšoanelo nakong ea joale. Ekaba, sesosa e ka ba maemo a leholimo, mongobo o mongata o kene ka hara lipikara tseo. 'Me ha li sebetse hantle, le ho qala, ekaba lona lebaka.

⁵¹¹ Mona ke bona ho lutse khaitseli eo ke mo tsebang, Khaitseli Arganbright. Ke...Ha ho monate 'me—'me hase tšoanelo, ho botsa sena, empa na u utloetse ka Moena Arganbright esale a tšela? Ke thahasella ho utloa tsa hae hang ha re ka khona. O koana Switzerlane le Jeremane, mono kopanong le Moena Tommy Hicks le Paul Cain. Ha u ka utloela, Khaitseli Ruth, o ntsebise ka potlako, kapele ha u khona.

⁵¹² Joale, tabernakele e nyenyane ha e na lengolo la botho, empa re na le botsoalle. Ha re na tumeloana haese Kreste, ha ho molao haese lerato, ha ho buka haese Bibele. Ke eona feela Buka eo re e tsebang, le eona feela ntho eo re e tsebang, eo re e tšoereng. Nakong eo Mali a Jesu Kreste a ntseg a re hloekisa libe tsohle, re kene botsoalleng le e mong le e mong, mang le mang.

⁵¹³ Ke eleletsoe, hoseng hona, ekaba batho ba utloile moena ea rapelang. E ne e le Mokatolike, ka hona, kapa Mokatolike oa mehleng. 'Me mona re eteloa ke batho ba mefuta eohle. Ke sa tsoa fuoa monyetla, nakoana e fetileng, ho tsukutla letsoho le moena ea lutseng mona oa Bamennonite. Le ho hlaha ho Bamennonite, ho tsoa ho Bamethodise, ho tsoa ho Mabaptise, le Katolike, kapa le mang feela, ba ke ba tle. 'Me re tšoara botsoalle re teetse mahlohonolo a Lentsoe la Molimo hare. Mona ho lutse Paki ea Jehova le batho ba fapaneng, ke bone malumeli a fapaneng.

⁵¹⁴ Ke ne ke rata (be, le joale bo) Bophirimela. Ke rata lipere le makromo. Ke holetse polasing, 'me ke—ke a e rata. 'Me re ne re tšoara 'moka, ebe ke tsamaea le bona. Mono re hlomme moterothibella. Ha ke tsebe haeba lona batho ba Bochabela le tseba seo moterothibella o leng sona, kapa che. Ke mohla

o hlahlelang makhomo e—e morung, ba tlama lekhoakhoa le li thibang, li se khutle ho kena mapolasing. Li ja joang, bo lemetsoeng ho li fepa mariha. Hape koana holimo thabeng, le bona ba hlomme meterothibella, teng ba khetha litše hali le litona tse baliloeng, le lilo tse joalo. O bitsoa moterothibella. Empa moterothibella o moholo o fumanaoa moo mopolasi a emeng ha likhomo li feta.

⁵¹⁵ Nkile ka lula mono, matsatsi a mangata, holima qhana ea ka, ke shebeletse makhomo ao a fetang. Ho ne ho kena matšoao a mefuta eohle. A mang a bitsoa “Taemane.” Le a mang a bitsoa “Tšiea X.” Le a mang... La rōna e le “Maototharo,” ntho e kang letšoao la Moshanyana oa Sekaoto. Thaka le latelang, katlasana, e ne e le “maotoana a kalakunu” holima pere. Ba ne ba tlapisitse matšoao a mefuta eohle, ho—ho tseba likhomo tsa bona ha ba li ntša.

⁵¹⁶ Joale, mopolasi o ne a sa thahaselle letšoao la tsona hakaalo, empa taba ke ena, mopolasi o tsepamisa mahlo holima tekete ea tsebe tsa tsona. Ntho eohle e kenang mono, ho sa natse letšoao, eka khona e be Hereford ea mali. Ha e lumelloe ho kena haese Hereford. E ne e tlamehile ho ba lesika le rejisetaruoeng kapa ha e lumelloe ho feta.

⁵¹⁷ Kea kholoa, mohla Morena a tlang, A ke ke a tsotella matšoao ao re a khoesitseng, empa hore na bohle re Bakreste ba tsoetsoeng labobeli na. Ke hantle. Ke lona lesika la Kreste. Re tla pakoa ke teko ea Mali, hore re Bakreste kaofela na. Efela haeba bohle re tla ba joalo *mono*, re hle re be joalo mona. Ha le hopole joalo? Ke eona tsela, re ananela botsoalle bohle ba likereke tse fapaneng.

⁵¹⁸ Joale re ntse re hlahloba Buka e bokoang ena ea Baheberu. Moena e mong o e thabetse hoo a hatisitseng mabantā 'me o hlophisa buka ea lithupello ka eona.

⁵¹⁹ Joale re tlil'o fihla, kapele, khaolong ea 11. Re lebeletse ho qeta mariha holima eona, khaolong ea 11. Kaha semelo sefe le sefe mono, re lakalitse ho haola le Buka re ntse re e tlamahanya le Lengolo lohle. Ke ne ke tla etsa joalo. Ke ntse ke e etsa ka karoloana, likhaolong tse ling tsena, tse fetileng, ho tlamahanya Buka eohle 'moho. Hoba, u a bona, Lengolo le leng eka khona le pake Lengolo le leng.

⁵²⁰ Ka baka leo, khanyetso ha e le teng, ha motho a hopola hobane Mangolo a itoantšoa, eo ke phoso. Ha ho Lengolo le leanang le Lengolo. E—e khanyetso e fihla ha Le hanyetsa hlalohanyo ea chebo ea rōna ea Lona, empa ha Le ke le Itoantša. Ke qetile nakoana tšebetsong ena, ke se ke nanarela lilemo tse mashome a mabeli a metso e tšeletseng joale, 'me le ka mohla, ka lekhetlo le le leng, ha ke eso fumane ntho le e 'ngoe e ka hara Bibebe e thulanang le ntho efe e ngoliloeng kahara Bibebe. 'Me ke—ke e tseba e le sieo mono.

⁵²¹ 'Me kajeno re hlahloba e 'ngoe ea likhaolo tse bokoang ka ho fetisa tsa Baheberu, khaolo ea 7. Motho ea sa tšoarang Bibele, a mpa a batla ho salapalo ena morao, re ka thabela ho u tlisetsa Bibele ha u ka phahamisa letsoho la hao. Ke tla laela baholo ba itseng, motho e mong, ho tla nka tse ling koano. Batho ba phahamisitseng matsoho a bona ba teng morao mane. 'Me kea ū leboha, moena. 'Me ha u batla Bibele, phahamisa letsoho la hao feela, 'me ba tla u tlisetsa eona.

⁵²² Joale, mokhoa oa ho thea kereke, mokhoa oo motho a ka fuoang Tumelo, hase ka bolumeli ba hae, hase ka boikamahanyo ba hae. Empa Tumelo ea hae ha e a theoa holima thutamolimo ea lihlalohanyo tsa motho, kaha eona, bonnyane, e le motho ka botlalo. Empa mokhoa oo Tumelo e ka iphumanelang nqalo ea eona e mahlonoko ea phomolo, ke holima Lentsoe la Molimo le sa sisinyeheng le sa fetoheng. "Tumelo e tla ka kutlo, kutlo ea Lentsoe." E etsahala joalo. 'Me—'me ha Tumelo e utluoa 'me e amoheloa, ke ho fela. Ha ho letho le ka hlolang le e suthisa, ho sa tsottelehe se tlang le se tsamaeang. Ha ho letho le ka fetolang Tumelo eo. E naheneng. U ankoriloe, 'me ha u sa tla fetoha, ka nako le ka Bosafeleng. U ankoriloe kamehla, "Hoba Molimo, ka sehlabelo se le seng, o phethisitse kamehla bao ba hlatoitsoeng, kapa ba bitsitsoeng."

⁵²³ 'Me Tumelo e ruile malulo a matonana ka ho Mokreste, bophelong ba molumeli, hoo e ka emang le pela lebitla le seretse kapa holima lekese, moo lesea le khabane kapa moratuoa a faletseng bophelong bona ho ea mose oane. 'Me e kalole leihlo le bohale la ntsu, e ka talima ho Ea itseng, "Ke 'Na tsoho le Bophelo." 'Me ba lebala tse kamorao. Ba hahamalla pele pheong ea pitso e holimo.

⁵²⁴ Ke thabetse Molimo ha o hlahisitse hoo, 'me a e neile bohle tefiso e le sieo. Likereke li tlameha ho fetoha seo. *Likereke* ha li bolele malumeli kapa mekhatalo; e bolela, "Lihlopha tsa batho, tsa balumeli, ba phuthehileng 'moho tlasa setsoalle sa Lentsoe."

⁵²⁵ 'Me thutong e babatsehang ena ea Mohalaleli Pauluse mona, metheong, likhaolong tse qalang, esale a tšoarane le BoMolimo bo tlotlehileng ba Morena Jesu le hore E ne e le mang. Kreste e ne e le Molimo, o entsoeng ka mokhoa oa hore batho ba tle ba O phopholetse 'me ba O ame, le—le ho kena setsoalleng le Oona. Kreste, Morena Jesu, e ne e le 'mele oo Molimo o nong o ahile ka ho oona, "Molimo o no o etsoe nama oa aha hara rōna." Timothea oa Pele 3:16, "Ruri sephiri sa borapeli se seholo, hoba Molimo o bonahetse nameng."

⁵²⁶ Jehova e moholo o ne a theohe a etsoa ea ka angoang, ka ho phela kahara 'mele oa Mora oa Oona ka Sebele, e ho hlalosa le ho busetsa lefatše ho Oona. Molimo e ne e se letho... Kreste e ne e se letho haese Molimo, le—le Molimo e ne e se letho haese

Kreste. Bobeli boo bo bopile BoMolimo ka 'mele, o beiloeng katlasana ho Mangeloi, hore A tle a utloe bohloko. Mangeloi a ke ke a utloa bohloko. Jesu e ne e tabernakele eo Molimo o nong o ahile ho eona.

⁵²⁷ Bibebe e boletse, khaolong ea 7 ea Liketso tsa Baapostola, ho itsoe, "Litabernakele, ha U a ka ua khahlisoa ke lihlabelo tse chesitsoeng le linyehelo tse chesitsoeng, empa U Ntokiselitse 'mele. Koana Ea Holimolimo a ke ke a aha litabernakeleng tse entsoeng ka matsoho, empa U Ntokiselitse 'mele," ho lula ka hara tabernakele kapa ho aha le motho ka setsoalle.

⁵²⁸ Ha Molimo o lumela, hang hoba re qete ka khaolo ena mona, kapa ho qeta ka Buka ena, re batla ho khutla re tšoarane le Buka ea Ruthe re bontše ka moo Molimo o kileng oa fetoha mohaborōna kateng, ho boelanya ba lahlehileng le Eēna ka botsoalle le ka ho fetoha e mong oa rōna. Molopolli eka khona ebe oa lesika la rōna, 'me mokhoa o le mong oo Molimo o ka fetohang oa lesika la rōna, ke ho fetoha e mong oa rōna. Ka baka leo, O ne a ke ke a fetoha Lengeloi ea eba lesika la habo motho.

⁵²⁹ Maobane mantsiboea ha ke qoqa le mora ea robehileng pelō, motlatsi oa ka, oa 'mè ea seng a iketse, ho itsoe, "Oho Moena Bill, kea kholoa bosiung bona ke Lengeloi."

⁵³⁰ Ka re, "Che, Earl. A ke ke a fetoha Lengeloi le ka mohla. Ke mosali, bosiung bona, ka moo Molimo a mo bopileng, 'me o tla itulela a le joalo, ha se Lengeloi le ka mohla." Molimo o bopile Mangeloi. Ha O eso bope batho hore ba fetoha Mangeloi. O bopile Mangeloi le batho. Ka baka leo batho ba ke ke ba fetoha Mangeloi le ka mohla, le Mangeloi a ke ke a fetoha batho. Molimo o ba bopile ba fapane.

⁵³¹ Joale, ka ho fetoha nama Kreste ho lopolla motho ea timetseng boholong boo bo mose oane, 'me hoo ho theohileng ho sa bolaoe ke sebe, Molimo o theohile oa apara seboleho sa setšoano sa motho, oa fetoha lesika la haborōna, hore O tle o ipelese libe tsa rōna le lefu la rōna.

⁵³² 'Me re takile setšoantšo se seng, lithutong tse fetileng; ke motheo o fang setlabocha monyeta oa ho utloisia. Molimo, leetong la Oona la Kalvari. Tsenene ea lefu e ne e Mo apere, e ntse e bobola e Mo likoloha, qetellong ea Mo hlaba A a ba a shoa. A shoa hofihlela letsatsi le hana ho chaba. A shoa hofihlela khoeli le linaleli li hana ho khantša leseli la tsona.

⁵³³ Hoba, ka moo A kileng a tlameha ho etsa hoo, ho tsetela tsenene ea lefu! Hola Ea eba motho ea sa shoeng, hola a tlie ka seboleho sa theofani, kapa ka moea, lefu le sitoa ho laola mono. O ile a tlameha ho fetoha nama, hore A tle a amohele tsenene ea lefu. Empa hang ha notši kapa ha kokoanyana e hlaba, hang ha e hlaba e tebisa, ha e sa tla hlola e hlaba. E siea tsenene ea eona nameng. 'Me ke sona seo Kreste a se

fe-...kapa seo Molimo o ileng oa fetoha sona. Kreste o ne a ahile nameng, hore A tle a tsetele tsenene ea lefu nameng ea Hae ka Sebele. Mohla lefu le ne le fothoha ho Eèna sefapanong, le siile tsenene ea lona, le ke ke la hlola le hlaba molumeli hape. Le ka hoeshetsa, le ka bobola la rora, empa ha le khone ho hlaba. Ha le na tsenene.

⁵³⁴ Mohalaleli Pauluse oa senatla, leetong la hae la lefu, o ile a hooeletsa a re, “Oho uena lefu, tsenene ea hao e kae? Le uena lebitla, ho hlola ha hao ho kae? Empa ho lebohuoe Molimo ea re fileng tlholo ka Morena Jesu Kreste oa rôna, hobane lefu le lebitla li lahlehetsoe ke matla a tsona.”

⁵³⁵ Joale, hape, Sontaha se fetileng re ile ra tšoarana le hoo, “Ha re feteng lithuto tsa Kreste,” khaolong ea 6, re bala sena, “ha re feteleng kholong e tletseng.” ’Me re fumane batho kahara likereke kajeno, ho akha tabernakele ea Branham kahare le tse fapaneng, haholo re toboketsa ho ithuta lithuto tsa Kreste: E ne e le Mora oa Abraham, E ne e le mora oa—oa sekete-kete, le ho khutla joalo, masika ao. Empa Bibele e itse, “Ha re feteng lintho tseo, re feteleng kholong e tletseng.”

⁵³⁶ Pele u tlameha ho tseba thuto, hape u tšoanelo ho tseba lintho tsena tsohle; re ntano li beella kathoko, O itse, e leng tsa tsoho ea bafu, tsa lipeo tsa matsoho, likolobetso, le tsa litaelo tseo tsohle tse shoeleng tsa Molimo. Athe, ebile ha li—li na Bophelo ho tsona. Empa kajeno kereke e hahamalla lintho tseo feelsa, “Oh, re lumela BoMolimo ba Kreste.” E. Ehlide. “Re lumela kolobetso ea metsi.” E. Ehlide. “Peho ea matsoho.”

⁵³⁷ Pauluse o boletse, “Re tla khutlela ho tsona ha Molimo o lumela. Empa holima tseo tsohle, ha re li beelleng kathoko joale, re feteleng kholong e tletseng.”

⁵³⁸ Joale, kereke e ke ke ea phethisisoa ke mekhatlo. E suthela hole le Molimo, ka linako tsohle, kapa hole le e ’ngoe. Re haha marako, rea ikarola, ka ho hloka Tumelo. Empa ha re tlohela melao eo ea lithuto, haeba re fetela kholong e tletseng, linthoana tseo ha li sebetse hakaalo.

⁵³⁹ Re kena kamanong, tsela ea ho phetheha re e fumana e le ka ho kena ka ho Kreste feelsa. Hape re fumana, ho latela lithuto tsa Bibele, mokhoa oa ho kena ka ho Kreste; e se ka kolobetso ea metsi, e se ka peho ea matsoho, e se ka thuto. “Empa ka Moea o le mong re kolobeletsoa bohole ’Meleng o le mong ’me re phethisoa ke matšoenyeho a Hae.” Ke moo, re shebehang re fapanane. Re nahana ka ho fapanane. Re itšoara ka ho fapanane. Re phela ka ho fapanane. Ha se ka tlameho kapa ka ho fetoha setho sa kereke, empa kahobane “lerato la Molimo le tšetsoe lipelöng tsa rôna ke Moea o Halalelang,” hoo ho re fetola baahi-’moho ba ’Muso oa Molimo, ka mono ha ho bolumeli ba mokhatlo kapa marako. Bohle re ’Mele o moholo o le mong.

⁵⁴⁰ Joale re itokisitse ho kena thutong ea hoseng, nakoaneng e seng kae. Ntho e le 'ngoe hape eo ke ratang ho e finyella mona, eona ke ena, ho re, Pauluse ha a bua kahara Buka, ea bo 7 . . . kapa khaolong ea 6, mona re fumana re phethahatsoa ka ho Kreste. Entano ba temana ea 13 ea khaolo ea 6, motheeo o seng mokae.

Hobane Molimo mohla o neng o etsetsa Abrahama pallo, kahobane ho ne ho se e mong ea O fetisang eo o neng o ka hlapanya ka eëna, o hlapantse ka oona,

Molimo o hlapantse ka Oona, kaha ho ne ho se ea O fetisang eo o neng o ka hlapanya ka eëna.

⁵⁴¹ Joale re batla ho khutlela morao. Ha re tšoareng Bagalata nakoana feela. Phetlang morao Bukeng ea Bagalata, le phetle ho Bagalata 3:16. 'Me re tla bala mona nakoana feela, hore O hlapantse ka mang.

'Me joale pallo li etselitsoe Abrahama le leloko la hae. Ha ho thoe, Meloko, joaloka hoja ho boleloa e mengata; empa ka ho lekanya le le leng feela, . . . ho leloko la hao, e leng Kreste.

⁵⁴² Joale ha u ka elelloa, ha re le bala ka kelohloko joale, ha re bala.

. . . lipallo (bongateng) li etselitsoe Abrahama le leloko (bonngoeng) la hae.

⁵⁴³ "Abrahama le Peō ea hae." Joale, Peō ea Abrahama e ne e le a le mong, e leng Kreste; ka papiso, ea Isaaka.

Empa Abrahama o ne a ena le bana ba bangata. O fumane e mong pele ho Isaaka, ketso e supileng boitšunyako ba Sara ea haelloang ke tumelo ea neng a batile Anna ho hlahisa ngoana, a ikhopola a tsotetse haholo, le hore Molimo o koekoetle o hlahise tsela eseole ho eo O neng o tsepisitse ho e sebetsa ka eona.

⁵⁴⁴ Empa Molimo o boloka pallo ea Oona. Ho sa tsotellehe ka moo e kang e haelloa ke mabaka, Molimo o tlamehile pallong ea Oona. Athe Sara o ne a hopotse ho inkela Anna . . . kapa Agare, ke rialo, lekhabunyane la hae, ho tsoalla Abrahama lesea, 'me a tla inkela lona. Eaba ho hlahi Ishmaele, haesale e le phatsa e kahara leihlo, ho tloha moo hofihlela joale. Le joale ke phatsa e kahara leihlo, hoba mono ho tsoiele Maarabia, 'me esale ba le joalo.

⁵⁴⁵ Joale, nako le nako ha u sa lumele Lentsoe la Molimo le hlobotseng u ikhethela tsela e itseng, e tla be esale e le phatsa kahara leihlo la hao ho tloha mohlang oo. Nka feela seo Molimo o se boletseng. Efèla ha A E buile, ke sona seo A se bolelang. Oh, ho bokoe Lebitso la Hae! Nka Lentsoe la Hae feela.

⁵⁴⁶ Ho sa tsotelloe ntho e lekang ho feta mohoalotso, ho thoe, "Be, ehlile ha Le bolele Hoo." Le bolela hantle seo Le se buang, ha Molimo a etsa tsepiso.

⁵⁴⁷ Joale ha re ka elelloa ka kelohloko.

...*lipallo li etselitsoe Abrahama le leloko la hae...*

E Mong e ne e le Peō, bonngoeng, 'me tse ling e le lipallo. Lipallo li feta bonngoe ka palo, le batho ba kentsoeng ho Peō ea Abrahama ba feta bonngoe ka palo. Ua bona? Peō e 'ngoe, athe batho ba Peō ena ba bangata. Ua bona? E ne e se Abrahama a le mong, kapa ho Isaaka a le mong. Empa bo... Ntho eohle e ne e le Peō ea Abrahama. Lipallo li etselitsoe e mong le e mong le setho seo e leng peō ea Peō eo. Lea e tšoara? [Phutheho e re, "Amen."—Mong.]

⁵⁴⁸ "Ka baka leo, rōna, ba shoeleng ka ho Kreste, ho latela Mangolo, re nka Peō ea Abrahama le majalefa ka pallo." Ha se ka ho ingolisa le kereke, kapa ka ho rala litaeloana tse shoeleng, kapa—kapa ka ntho e joalo. Empa ka ho tsoaloa ke Moea oa Kreste, re Peō ea Abrahama, le majalefa 'moho le Eèna 'Musong.

⁵⁴⁹ Ebe re tsoelapele, ho bala, ke hona, re ea pejana joale, "Molimo o kenya kano." Joale temana ea 17 ea khaolo ea 6.

Ke ka baka leo Molimo, mohla o ratileng...

...*Molimo, mohla o ratileng ho kholisia majalefa a pallo hoba morero oa oona ha o na ho fetoha, o kileng oa kenya ka kano:*

⁵⁵⁰ Oh, ha re e phomoleng metsotso e 'maloa joale. "Molimo mohla o ratileng." O ne O sa tlameha, empa e ne e le ho kholisia ketso ena.

⁵⁵¹ Joale, re fumane Molimo o fetoha nama, oa aha hara rōna, ka moo O bonahetseng ho lefatše ka sebele sa Oona. Mohla O ne o fihlela mosali ea bokang, oa re, "'Na ha Ke etse hoo—'Na ha Ke u ahlole. E-ea, u se hlole o etsa sebe." Enereha O fumana bakuli, O sebelitse ka moo ho neng ho Mo tlama, kaha E ne e le Molimo, 'me O—O folisitse bakuli. Oa tsosa bafu. Oa tšoarela libe. Ho sa tsottelehe mokhoa oa bona, le bongata ba tsona, le ho oa ha bona mohaung, O ile oa ba tšoarela, le hona, haeba ba batlile ho tla le ho kopa.

⁵⁵² Joale le lemohe. Efèla ha Molimo o kile oa sebetsa maemo ka tsela e ikhethang, mohla maemo ao a boelang a hlaha, khetlo labobeli O tlameha ho sebetsa se ka O sebelitse khetlo la pele ho seng joalo ha O a loka. Ua bona? Ho sa tsottelehe bokhopo ba hao sebeng, hore u nyehlile hakae, O tlamehile ho u sebeletsa se ka O sebelelitse mosali ea tlotseng molao ho seng joalo O sebelitse ka phoso mohlang oo. Boitšoaro ba Molimo ke Botho ba Oona, 'me seo O leng sona boitšoarong ba Oona se hlalosa Botho ba Oona.

⁵⁵³ Le uena u joalo, boitšoaro ba bophelo ba hao, bo hlalosa semelo sa hao. Kamoo re haotseng teng, thutong e le 'ngoe kapa tse peli tse fetileng, batho ba Methodise ba ne ba batlile

ho hlalosa, "Ha u hlabo litlatse, u O amohetse." Pentekosta e re, "Ha u bua ka lipuo, u O fumane." Bareketli ba itse, "Ha u reketla, u O fumane," Bareketli ba Pennsylvania. 'Me re ba fihetse ba fositse bohole. Ke bophelo ba hao bo O hlalosa. Botho ba hao bo hlalosa seo u leng sona. Motho o tsejoea ka mesebetsi ea hae, e leng hore bophelo ba hao ke bofe.

⁵⁵⁴ Le utloile pale ea khale, "Bophelo ba hao bo a hloliea, ebile ha ke utloe mantsoe a hao." Seo u leng sona, u sona. Bophelo boo u bo phelang bo supa tšobotsi ea moea o ahileng ka ho uena.

⁵⁵⁵ Hape u ka lekisa ntho e phoso...kapa oa lekisa ntho e nèpahetseng, nka rialo. U ka lekisa Mokreste. Empa neng-neng, bokamosong, u tla koebetelloa tlasa khatello, 'me semelo sa hao se tla hlahatsoa. Lehlaahlela le lla ka le leng.

⁵⁵⁶ Mohla Kreste Mora Molimo a ne a fetisoa tekong, e hlalitse semelo sa Hae. Ehlide. Mohla o beoang tlasa teko, e tla paka semelo sa hao. Bophelo ba hao bo halimisa se kahare ho uena kamehla. Neng-neng, ako kholisehe hoba libe tsa hao li tla u tšoara. 'Me ke sona seo re lekang ho se bua.

⁵⁵⁷ Jesu o boletse, ho Mohalaleli Johanne 5:24, "Ea utloang," e seng ea reketlang, ea buang. Ea... "Ea utloang Lentsoe la Ka, 'me a lumela ho Ea romileng 'Na, o na le Bophelo Bosafeleng, 'me a ke ke a tla kahlolong; empa o tlohile lefung ho kena Bophelong."

⁵⁵⁸ Ke tumelo ea hao. 'Me tumelo ea hao, ha e boleloa ke melomo ea hao, e bontša ho batho ba khonang ho utloa, empa bophelo bo pepenehile pel'a bohole. Ka hona, ho sa tsotellehe ka moo u lekang boetsisi *bona* le boetsisi *bane*, e ke ke ea sebetsa. Eka khona ebe kahare ho uena. Ke oona mafura a pale eohle. Tumelo ea hao ho Kreste ea tshileng, joaloka Mopholosi oa hao; hore O lutse letsohong le letona la Molimo, a ntse a u buella hoseng hona, ka moo le uena u Mo emetseng tlase mona u le paki. Paki e emela motho e mong, e u emela joaloka paki. 'Me ka moo bophelo ba hao mona bo halimisang seo bopaki ba hao bo leng sona ka ho Kreste, bo boela bo halimisa koana bo boele bo halimise mona. 'Me Ea le teng holimo mane, A le seo a leng sona ho uena, se halima mane le mona. Ka baka leo u... Ka tumelo ea hao, u a bolokeha, hommeng ka eona e inotši. Ka hona, litšisimoho, maikutlo, boikutlo, le ntho efe, ha e a sieloa litulo tsa letho ho Oona. Joale, ha se...

⁵⁵⁹ Joale, le se nahane hampe, ho thoe ha ke lumele litšisimoho tsena. Ehlide. Empa khang ea rōna joale, re ntse re leka ho e khokhotella ho batho ba letsatsi lena, hore ha se litšisimoho. Liabolosi o nkile lintho tseo 'me o hlahafalitse batho ka tsona, o ba lumella ho tšetleha mafinyello a bona a Bosafeleng holima tšisimoho. Ho hlaba litlatse, ho bua ka puo, ho tsamaea kereke Sontaha ka seng, ho lekisa Bokreste, e ke ke ea sebetsa ka

letsatsi leo. "Motho ha a sa tsoaloe labobel." 'Me bophelo ba hao bo halimisa seo u leng sona ka hare, ua bona, e seng litšisimoho tsa hao.

⁵⁶⁰ Mali a ka kopotsa matsohong a hao, u ka bua ka lipuo, u ka folisa bakuli, u ka suthisa lithaba ka tumelo ea hao, le joale ha u letho. Bakorinthe ba Pele 13. Ua bona? Eka khona ebe ntho e tlisoang ke Tsoalo e tsoang ho Molimo, 'me Molimo ke ona o kenyang Tsoalo e ncha ka ho uena, 'me o u nea karolo ea Hae. Ebe lintho tseo li joalo. U 'mopuoa e mocha. "Ke li fa Bosafeleng."

⁵⁶¹ Re haotse le lentsoe leo la "Bosafeleng." *Kamehla* ke "nako e baliloeng." *Bosafeleng* ke kamehla, kamehla le kamehla, empa Bosafeleng bo bong feela. 'Me re fihlela hore u amohela Bophelo Bosafeleng, 'me lentsoe la Segerike ke Zoe, e bolelang "Bophelo ba Molimo." 'Me u amohela karolo ea Bophelo ba Molimo, hoo ho u fetola mora oa Molimo ka moea, 'me u hlola kamehla joaloka Molimo le oona ha o hlola kamehla. Ha u na qetello, moo u khaotsang teng, kaha u sa ba le moo u qalang. Ntho efe e nang le qalo e na le qetello, 'me ho se nang qalo ha ho na qetello.

⁵⁶² Kamoo re ratang Lentsoe leo le theko e thata! Ka moo eka khonang hore Mokreste a tiisoe Tumelong e kileng ea neoa bahalaleli, a sa tenyetsehe kahohle, ho tloha sebakeng ho ea sebakeng, le ho ingolisa le likereke tse ngata. U itoketse ha batla ho kena kereke efe, ha feela u le Mokreste. Empa bea ntho ea pele tulong e kapele, e leng Tsoalo e u fetolang lesika la Molimo, joalokaha Molimo le oona o fetohile lesika la hao.

⁵⁶³ O fetohile lesika la rōna, a tle a u tsose. Le pele A ka u tsosa, O tlameha ho u fa Bophelo Bosafeleng. Eaba Molimo o tlameha ho fetoha lesika la haborōna, ho nka lefu, ho u tsosa. Ke moo le uena u tlamehang ho fetoha lesika la Hae, hore u tle u kene tsohong. Na u bona seo e leng sona? Empa e le kananyo. Molimo o fetohile uena, hore uena u tle u fetoha Molimo. Ua bona? Molimo o fetohile karolo ea hao, nama, hore uena ka mohau oa Oona u tle u fetoha karolo ea Oona, ke phetho, ho fumana Bophelo Bosafeleng.

⁵⁶⁴ Ke setšoantšo se setle bo, 'me, oh, rea se rata.

Joale, *Molimo, mohla o ratileng...*

⁵⁶⁵ O ne o sa tlameha, empa O ne o ratile. Ke thabetse hoo, lona le reng, haele moo Molimo oa rōna o ratile? Shebang. Hola A—hola A ne a se mamello teng? Tholoana ea Moea ke efe? Lerato, thabo, tumelo, khotso, mamello. Eo ke karolo ea Molimo e ka hare ho uena. 'Me re ka leballa, ho leballa ba bang meroalo. Ho tšoarelana, ka moo Molimo le oona a u tšoarelang ka baka la Kreste. Moea oa Molimo u ahileng ka ho uena o u fetola hoo kahare. 'Me mohla Molimo o ne o le holima lefatše mona 'me o fetoha uena, o fetoha sebe, ke Oona o nkileng sebe sa hao, oa u leballa sona oa lefella molato oa sona. Molimo o na le mamello, o re leballa liphahlo.

⁵⁶⁶ Ebile Ke Molimo o lokileng. Ha u batla, lintho tse ikhethang, u a tseba, Molimo o lokile ho lekaneng ho phethisa hoo. O rata ho—ho u thabisa. O batla joalo. Oona, Ke lerato, 'me lerato la Oona le totileng le Mo susumetsa ho theoha ka linako tse ling, ho u lumella lintho tseo u li batlang.

⁵⁶⁷ Shebang Thomase, ka mora tsoho. Thomase o ne a sa lumele. Oh, kajeno o na le bana ba bangata. Empa Thomase o itse, "Che. Che. Ke tšoanetse ho bona bopaki bo itseng. Ke tlameha ho sunya seatla sa ka lehlakoreng la Hae, le nthong ea Hae... menoana ea ka matsohong a Hae mona, pele nka E lumela. Ke, ha ke tsotelle seo le se buang." Ua bona, o ne a fapohile taolo ea Mangolo ka botlalo, hona moo. U tlamehile ho E lumela. Ka baka leo a re, "Ke tla tlameha ho fuoa bopaki ba mofuta, bo E pakang."

⁵⁶⁸ Eaba Jesu o a hlaha, O lokile, "Tloo koano, Thomase, haeba u batla hoo, be, ke sena. U ka se fumana."

⁵⁶⁹ Le rōna re joalo. Re re, "Morena, ke tlameha ho bua ka lipuo. Ke—ke tlameha ho hlaba litlatse. Ke tlameha..."

⁵⁷⁰ "Oh, tsoelapele, Ke tla u nea eona." O lokile.

⁵⁷¹ Eaba o sunya letsoho la hae lehlakoreng la Hae, a ntano re, "Oh, ke Morena oa ka le Molimo oa ka."

⁵⁷² A re, "Joale, Thomase, u lumela hoba u bone. Empa o mokakang moputso oa ba E lumelang ba sa bona!" Ke lona bao. Re tlameha ho ea moo. "Moputso oa ba lumelang ba sa E bona o moholo." Ke khato ea tumelo, hore re E amohele.

⁵⁷³ Joale, ke lumela lipontšo tse tsamaeang le balumeli, empa ha re beeng lintho tsa pele kapele. U ka fumana lipontšo, u ntse u sa fuoa Sena. Pauluse o itse u ka khona. O itse, "Leha nka bua ka lipuo tsa batho le tsa Mangeloi; ha ke letho. Nka suthisa lithaba ka tumelo ea ka; ha ke letho. Nka utloisia Bibele, hoo nka tsebang liphiri tsohle tsa Molimo; ha ke letho." Ua bona, tseo ke lineo tsa Moea o Halalelang, kantle ho Moea o Halalelang.

⁵⁷⁴ Moea o Halalelang ke Molimo. Molimo ke lerato, thabo, khotso, mamello, mosa, tiisetso. Oo ke Moea oa Molimo. Ke sona seo Molimo o se tsosang matsatsing a qetelo, ka Moea oo.

⁵⁷⁵ Joale, "Ha o rate..."

...Molimo, ha o se o ratile ho feta *ho kholisisa majalefa a pallo...*

...Molimo, ha o se o ratile ho feta...*ho kholisisa majalefa...*

Majalefa ke afe? "Rōna, ha re shoele ka ho Kreste, re nka Peō ea Abrahama, re fetoha majalefa." Oh, na e a thophothela? Re majalefa a 'Muso oa Molimo, ka pallo e hlapantsoeng. Molimo o ne o sa tlameha ho hlapanya. Lentsoe la Oona le phethehile. Empa Oa boela oa hlapanya, hape, ka Oona, ka ha ho ne ho se o o fetisang ka boholo.

⁵⁷⁶ Re sa bala, re khatha tema, mamela.

...eona *hoba morero oa oona ha o na ho fetoha, o kilenq oa kenya kano:*

⁵⁷⁷ “Fetoha,” ea sa hlanoheng. Molimo o ke ke oa hlanoha. O tlameha ho itulela a tšoana. Efèla ha Molimo kile oa folisa motho ea kulang, O ke ke oa hlanola semelo sa Oona. Molimo ha o tšoarela moetsalibe a le mong, seotsoa se le seng, O ke ke oa hlanola semelo sa Oona. Ho se fetoha, Lentsoe la Molimo le sa hlanoheng. Molimo o boletse, sebakeng se seng, “Ke ’Na Morena ea phekolang maloetse a lona kaofela.” O tlameha ho tiisetsa ho Lona, hoba Ke mohlokapheletso. O tsebile qetello esale qalong.

⁵⁷⁸ Joale, nka rialo, “Ke tla etsa *sena*.” ’Me Bibele e boletse, re tlameha ho re, “Ha Morena a ratile.” Hobane, ke ngoana motho. Ha ke tsebe. Nako tse ling ke tlameha ho honyetsa lentsoe la ka, empa Molimo o ke ke oa honyetsa la Oona. Ke Molimo.

⁵⁷⁹ ’Me O kopile ntho e le ’ngoe feela, “Ha u lumela.” Oh, khili! “Ha u lumela, tsohle li ka etsoa.” “Ha u lumela,” ke phetho. “Uena, ha u ka khona,” potso ke eo. Empa ha se potso ka Lentsoe la Molimo, hobane, ka ho se fetoha ha Oona, O ke ke oa hlanoha. Ha se le ho babatseha bo!

⁵⁸⁰ Joale mamela, ha re bala re khatha tema.

Ka ho tiea ka baka la ntho tse peli tse sa sisinyeheng, tseo Molimo o neng o ke ke oa etsa leshano ho tsona, . . .

Ho se sisinyehe! Ho se sisinyehe le ho se fetoha ke lentsoe le tšoanang; e ke ke ea hlanoha, ha e suthe. E tlameha ho itulela e tšoana kamehla. E ke ke ea hlanoloa, ho se fetoha le ho se sisinyehe.

’Me li peli, ka baka la ntho tse peli tse sa sisinyeheng, tseo Molimo o neng o ke ke oa etsa leshano ho tsona, . . .

“Na ebe re na le lintho tse peli?” E. Ea pele, Lentsoe la Oona le itse O tla e phethisa. Ea bobeli e ne e le kano ea Oona e hlapantsoeng, hore O tla e etsa. Oh, khili!

⁵⁸¹ Re tlameha ho ba batho ba mofuta mong? Horeng re tlameha ho huleloa koana le ho akheloa koana, le ho amohela lintho tsa lefatše re itšoare sa Mokreste enoa oa foromo ea lesika la 1957? Re batla lesika la rōna e le la sekhaleng le nkang Molimo Lentsoeng la Oona, le bitsang lintho tse neng li le sieo, eka hoja li ne li le teng. “Ha Molimo o fèla o itsalo, Ke phetho.”

⁵⁸² Abrahama, ea neiloeng pallo, ho eèna le ho Peō ea hae, o bitsitse lintho tse neng li le sieo, eka hoja li ne li le teng. Kaha, E ne e le pallo ea Molimo, o tsebile Molimo o ke ke oa etsa leshano. O mo tšepisitse eona, ’me o E lumetse. Eare ha lilemo li lebalisana, le pallo e ntse e suthela hojana, ho leihlo la nama, ho Abrahama Ea ’na ea atamela.

⁵⁸³ Sebakeng sa ho fokola, ho thoe, “Be, ekaba pholiso ea Khalalelo ha se ntho e teng. Ekaba ke tlaitse puo. Ekaba ha ho ntho e kang eo. Ekaba likutloisiso tsa ka li ne li fantse.” Ha ho le joalo, ho hlaka ntho e le ’ngoe, hore ha u eso tsoaloe labobeli. “Hoba ha...”

⁵⁸⁴ Re haotse mono Sontaha se fetileng, motšeо koana ho khaolo. “Hoba ha ho ka moo motho ea kileng a latsoa lineo tsa Leholimo le lintho tseo, a ka oang, hore a boele a inchafaletse pako.” Ruri, ha se ntho e ka etsoang!

Hoba eo *ea tsoetsoeng ke Molimo ha a etse 'me a ke ke a etsa sebe; hobane peō ea Molimo e lutse ho eēna: 'me a ke ke a etsa sebe,*...

Peō ea Molimo ke Lentsoe la Molimo. “Tumelo e tla ka kutlo, kutlo ea Lentsoe, ‘Sehlabelo se entsoe. Ho phethehile.’”

⁵⁸⁵ Joale, haeba u sitiloe, Molimo o tla u lefisa. Empa haeba u etsa, u le phoso, ha u e etse ka boomo. Khaolo ea 10, temaea ea 47, kea kholoa, “Hobane ha re etsa sebe ka boomo ha re se re neiloe tsebo ea ‘Nete.’” Empa hang hoba u Tsoaloe, u tšoere ‘Nete; e seng tsebo ea Eona, empa u amohetse ‘Nete ‘me E fetohile bonneta. ‘Me u ngoana oa Molimo, ka nako le ka Bosafeleng. Molimo o hlapantse oa re O tla e phethisa.

⁵⁸⁶ Jesu o itse, “Ea utloang Mantsoe a Ka, a lumela ho Eo ea romileng ‘Na, o na le Bophelo ba kamehla, ‘me Ke tla mo tsosa ka letsatsi la bofelo. A ke ke a tla kahlolong le ka mohla. O tlohile lefung ho kena Bophelong.” Joale ka kano e kang eo, “Molimo o ratile hore re ka Bo amohela.”

⁵⁸⁷ Joale ela seo a se buang hloko mona, Pauluse o bua le—le kereke.

...tseo Molimo o neng o ke ke oa etsa leshano ho tsona, re tlameha re be le tšeliso e fetisang ka ho tiea,...

E seng, “Be, haeba Mabaptise a sa ntšoare hantle, ke tla fallela ho Bamethodise.” Ua bona?

...re lokela ho ba le tšeliso e fetisang ka ho tiea, rōna ba phallelang tšepo eo re e beetsoeng kapele:

⁵⁸⁸ Joale ho baloa palo e qetellang.

Tšepo eo ho rōna e ka ankora ea moea,...

Eona tšepo, kano ea Molimo e hlapantsoeng, eo ho rōna e ka ankora ea moea, e tieang e sa sisinyeheng, e keneng ka koana kahare ho lona lesira;

⁵⁸⁹ Ha re bueng nakoana ka “lesira.” Ha rea e fumana ka nèpo bosiu ba Sontaha se fetileng.

⁵⁹⁰ “Ka hare ho lesira.” Lesira ke nama. Lesira ke lona le re sirang ho bona Molimo, sefahleho le sefahleho, ka hara kereke ena. Lesira ke lona le re sirang ho bona Mangeloi a emeng

malulong a oona hoseng hona, a emeng pela litulo. Lesira ke lona le re sirang ho bona Eèna. Re patiloe ka mora lesira, 'me lesira ke nama. Re bara le barali ba Molimo, re ka pel'a Sefahleho sa Molimo, "Mangeloi a Molimo a larile le ba Mo tsabang." Re ka pel'a Sefahleho sa Molimo, ka linako tsohle. "Nke Ke ka le tlohela, Nke ke ka le lahla. Ke tla ba le lona ka linako tsohle, ho isa bofelong." Empa lesira ke nama, ke eona e re thibelang Sefahleho sa Hae. Empa ka soule, Moea, re Mo tseba a re shebileka tumelo ea rôna. Oeme pel'a rôna. O teng mona hona joale.

⁵⁹¹ Tlase Dothane, hoseng ho hong, moperofeta oa khale o kile a teeloa hare ke lebotho 'me mohlanka oa hae a tsoa a re, "Oho ntate, naha eohle e thibeletsoe ke melata."

⁵⁹² Ebile Elia o ema, a re, "Khele, mora, ba ho rôna ba bangata ho feta ba ho bona."

⁵⁹³ Be, a tabanya mahlo a qamaka. Keha a sa bone letho.

⁵⁹⁴ A re, "Molimo, ke U kopa ho mo tutubolla mahlo, ho tlosa lesira." Eareha lesira le apoha mahlong a hae, moperofeta oa khale keha a teetsoe hare ke makoloi a mollo, thaba e tukisoa Mollo ke Mangeloi le makoloi. Ke moo he.

⁵⁹⁵ Oh, eaba Gehazi a ka reng, "Ke—ke a utloisia joale." Ua bona, lesira le ne le apohile. Ke eona t̄sita eo.

⁵⁹⁶ Ke ena mona. E t̄soreng ka thata. Lesira ke lona le re thibelang ho phela ka t̄sanelo. Lesira ke lona le re thibelang ho etsa lintho tseo re batlang ho li etsa ka 'nete. 'Me Molimo o ne o ipate ka morao ho lesira la nama, lesira le ne le haholoe ka lehare. Eaba Molimo o boela o fetoha Molimo, 'me Oa tsosa lesira leo O kileng oa Ipata kahara lona. Eo ke tsoho ea Morena Jesu. Taba e re pakelang hore, lesira lena leo re patiloeng kahara lona, re E lumela le ho E amohela ka tumelo. 'Me mohla lesira *lena* le haholoang ka lehare, ke tla kena ka pela Sefahleho sa Hae ka kholiseho ena, ke ntse ke tseba hobane, "Ke Mo tseba ka matla a tsoho ea Hae." Ho Khutleng ha Morena Jesu, lesira lena le tla boela le tsosoa, le se le phethahetse, ke tla tsamaea ke be ke buisane le Eèna e le Mopholosi oa ka le Molimo oa ka, mohla A hloellang terone ea Davida. 'Me re tla phela kamehla kahara lesira lena le se le phethahetse, empa sebe se teng kahara lesira lena. Ho sa tsottelehe na... Le se nahane ka 'mele o khanyang oo holima lefatše lena. O tlameha ho shoa, joaloka moea oa hao ha o tlameha ho shoa, ho ka tsoaloa labobeli.

⁵⁹⁷ Phethehong, e seng ho ja linama, le ho etsa *sena*, le ho phethahatsa 'mele, u ke ua E fumana. 'Me u tlameha ho t̄la *sena*, le ho etsa *sena*, le ho etsa *sena*, le ho etsa *sena*, oo ke molao. Bao ke ba eang ka molao. Ha re lumele mekhoeng ea pholoso ka molao. Re E lumela ha ho thoe re bolokehile ka mohau. 'Me ha se uena. Ha u amane le eona ka letho. Ke khetho ea Molimo e

sebetsang hoo. "Ha ho ea ka tlang ho 'Na a sa huloe ke Ntate oa Ka pele." Ke hantle. 'Me Eo... Sohle seo Jesu a tileng ho se etsa e ne e le ho fumana bana bao Ntate a ba tsebileng pele; o ba rerile pele ho motheo oa lefatše ho ba bara le barali ba Molimo. Amen. "Ha se ea mathang, kapa ea batlang, empa ke Molimo o hauhelang." E etsoa ke Molimo. U ke ke ua oa iphafa, ho hang. Ha u a etsa letho. Molimo, ka mohau, o u pholositse; ha se uena, ka bo-uena. Haeba u etsa, ke moo u ka iphafang ka ho hong. Empa u ke ke ua iphafa ka letho. Lithoriso tsohle li lebisoa ho Oona. Ke Oona. 'Me O u file tšepo e tiileng, "E hlapantsoeng ka kano, ha ho ka moo bana ba Oona ba ka lahlehang le ka mohla."

⁵⁹⁸ Joale, ha ba fosa ba tla shapuo. U kotula seo u se jetseng. U a e fumana. U se ke ua nahana hore u tla tsoa feela u etse sebe, u e pheme ho sa hlaha letho. Haeba u etsa, 'me u tšoere mohopolo oo, hoo ho u supa u sa ka ua tsoaloa labobeli. U a e tšoara na? Haeba takatso eo e sa u tšoere, ea ho etsa phoso, u sa ntse u le phoso. Ua bona? "Hoba O phethisitse, kamehla, bao ba..." 'Me libata tseo tse katlasa Testamente ea Khale, tlasa matsatsi a molao, tse hlahisoang selemo ka seng, se sa khaotse, se sitiloe ho tlosa sebe." Empa ha re beha matsoho a rōna holima hlooho ea Hae, re ipolela libe tsa rōna 'me re tsoaloa labobeli ke Moea oa Molimo, ha re sa lakatsa sebe. Ho uena sebe se felile. Mono ke ka nako le ka Bosafeleng.

⁵⁹⁹ U tla etsa liphoso. U tla oa. U tla etsa phoso ka boomo. U tla tsoa ka linako tse ling u etse lintho. Hoo ha ho bolele hobane u lahlehile. Hono ho bolela hore u tla lokisoa.

⁶⁰⁰ Moshanyana oa ka, hangata, bana ba ka, ba etsa lintho. Ba hao le bona, ba etsa hoo. Hono u... Ba e tseba e le khahlano le litaelo tsa hao—hao. 'Me ba tseba seo ba tla se lebella ha ba etsa hoo. Ba tla shashareloa eona, ka nako tse ling habohloko. Empa esale ngoana oa hao. Ruri.

⁶⁰¹ Ha ho ka moo motho eo a ka boela a timela, ea kileng a tsoalloa Bophelong Bosafeleng. Molimo ha se moabi oa Leindia. "Ea utloang Mantsoe a Ka, 'me a lumela ho Ea Nthomileng, o na le Bophelo ba kamehla; 'me a ke ke a tla kahlolong, empa o tlohile lefung ho kena Bophelong. Ke tla mo tsosa matsatsing a ho qetela." Eo ke pallo ea Molimo.

⁶⁰² Joale ha u tsoelapele, ho re, "Oh, be, nka iketsetsa feela..." Ke etsa seo ke se batlang ka linako tsohle. Empa ha u le Mokreste, ha u batle ho etsa phoso, hoba u na le Bophelo kahare ho uena, oona motheo. Ha u batla ho etsa phoso, hoo ho supa phoso e le teng ka *mona*. "Na seliba se le seng se ka ntša metsi a babang le a monate?"

⁶⁰³ Ka hona esale u ferekantsoe, ke maikutlo a mofuta kapa ntho e itseng e tsotehang, tšisimoho e itseng. E lebale. Khutlela aletareng u re, "Molimo, tlosa bophelo bona ba ka ba khale ba sebe ho 'na, 'me u mpehe moo takatso ea ka eohle..."

“Ea tsoetsoeng ke Molimo ha a etse sebe.” Ke hantle. Ha a na takatso ea ho etsa hoo.

⁶⁰⁴ Ruri, liabolosi o tla u cheha *mona le mane*, empa e seng ka boomo. Bibebe e itsalo. Liabolosi o tla mo cheha, hang ka nako. Ehlide, o tla e etsa. O ne a leke ho chehela Morena Jesu oa rōna maraba. O ne a sebetse Moshe joalo, ’me a mo qhautsa. O ne a sebetse Petrose joalo, ’me a mo qhautsa. O entse ba bangata joalo, empa... Petrose o bile a Mo latola, eaba o tloha a ea lla habohloko. Ntho e ne e le teng ka ho eēna.

⁶⁰⁵ Mohla leeba le ne le ntšoa arekeng... Lekhoaba le ne le tsoe, la likoloha kahohle. Le kile la lula kahara areka ke hantle, empa eitseha le tsoa, tlhaho ea lona e ne e fapane. Le khonne ho ja litopo tsohle tse shoeleng ka boithatelo, le bile le khotsofetse. Hobaneng? E ne e le lekhoaba, le ho qaleng. E ne e le mofielammila. Le ne le sa loka. E ne e le moiaketsi ea lutseng sehlaheng le leeba, le lekana le leeba ka boholo. Le khonne ho fofa hohle moo leeba le khonang. Empa le khonne ho ja lijo tse lokileng joaloka leeba ha le khonne ho ja. Hape le khone ho ja lijo tse bolileng, tseo leeba le sitiloeng ho li ja. Hoba, moloho oa leeba o fapane. Ke ’mopo o fapaneng. Ke leeba. ’Me leeba ha le khone ho sila lijo tse bolileng, kaha le se na nyooko.

⁶⁰⁶ Monna ea tsoetsoeng ke Moea oa Molimo o fetoha leeba la Molimo, tlhaho ea hae, phethoho ea hae, moloho oa hae. E, monghali. Ha u kenya moea oa e—oa leeba kahara lekhoaba, ha le sa tla lula holima setopo se shoeleng. Hola le ka lula ka phoso, ruri le tla sutha ka potlako. Le ke ke la khona ho se mamella. Motho ea tsoetsoeng ke Moea oa Molimo, ha a ke a lumella. A ka tsoha a kene tameneng, empa o tla tsoa ho eona ka potlako. A ka eko a ke mosali, a mo thintša, empa o tla boela a sokollla hloho ea hae. O tla tloha mono ka potlako. Hobaneng? Ke leeba. Ke hantle. U ke ke ua mo thetsa, hobane u a tseba. “Linku tsa Ka li tseba Puo ea Ka, o sele li ke ke tsa mo latela.” Ke leeba, le ho qaleng. Ke sona seo ke buang ka sona, ntho ea makhonthe e ankorang kahare ka mono.

⁶⁰⁷ Ela hloko joale. “Molimo o hlaptantse.” Oh, e...

Tšepo eo ho rōna e ka ankora ea moea, e...sa sisinyeheng, e keneng ka koana kahare—kahare e leng ho lesira;

⁶⁰⁸ “Lesira.” Molimo o ne o theohe, ka lesira la nama. Ho etsang? Ho Ipontša. Oa tlameha ho ipata, kaha re ne re ka sitoa ho O bona. ’Me O ile oa potela kamora lesira. ’Me lesira e ne e le mang? Jesu. “Ha se ’Na ea etsang mesebetsi, Ntate oa Ka,” Jesu o itsalo. “Ntate oa Ka o ahile ka ho ’Na. Kea sebetsa. Ntate o sa sebetsa, le ’Na ke sa sebetsa.” Ke Enoa moo a leng teng e le Ea patiloeng kamora lesira, o tsamaea ka nama, Molimo, Emmanuel, Molimo o na le rōna. “Molimo o ne o le ka Kreste, o khutlisetsa lefatše ho Oona.” Ke Enoa, o ntse a tsamaea hohle.

⁶⁰⁹ Joale, O theohile oa etsa hlatsuo, kapa khonahalo, kapa pheko, ke hore ka nyehelo ea lefu la Oona, o lefile mopupso oa sebe, hore A tle a khutle a tl'o aha kahare ho rōna. Ka hona tumelo ea rōna ke e—ke tumelo e kamora lesira, kapa ke motho ea kamora lesira. Ha ho le joalo ha re shebe lintho tseo re li bonang kahara lesira lena. Lesira le ruile lithuto, 'me le etsa lintho le bile le bua lintho. Ke ketso ea mahlale. Empa Moea oa Molimo o phelang o ahileng ka mona, o bitsa lintho tse neng li le sieo, eka hoja li ne li le teng, haeba Molimo a itsalo. Lesira la lona ke leo. Re kahare ho lesira.

⁶¹⁰ Joale, ka letsatsi le leng O tla tsosa lesira lena, le sa ke la tsoaloa ke mosali ka takatso ea monna le mosali, empa ka thato ea Molimo O tla e bua 'me e tla etsahala. [Moena Branham o thantse monoana oa hae—Mong.] Ke mohla re tla fuoa 'mele o kang 'mele oa Oona ka sebele o khanyang. Re tla kena kahare ho lesira, re tle re buisane le ba bang, re tsukutlane ka matsoho.

⁶¹¹ Joale, mohla re fallang mona, e teng tabernakele, theofani, e mpa e le setšoano sa motho feela, ha e je, ha e noe, ha e robale, e lula e phaphame. Re ea hona mono. Empa ba lutse tlasa Aletare, ba hlabu littatse, "Morena, ho tla ea ho le ho kae? Ha kae?" e batla ho theoha e khutlela fatše. Hobane, ba batla ho tsukutlana ka matsoho. Ba batla ho lula fatše le ho ja, le ho buisana. Ke batho. Ho bokoe Lebitso la Morena!

⁶¹² Mohla Molimo o ne o bopa motho ka setšoantšo sa Oona tšimolohong, O mo entse joalo. O ne a qoqa le e mong, kaha re tsebana. Re rata lintho tseo Molimo o re entseng tsona, kaha re entsoe joao. Ho Khutleng ha Oona ho hoholo, bao ba itokisitseng ba tla itulela ba le joalo kamehla. Re tla ema ka setšoano sa Oona, re sa shoe. Oho ho bokoe Lebitso la Kreste!

⁶¹³ 'Me joale re ruile tebeletso ea poloko ea rōna, ka nako ha re Mo amohela e le Mopholosi oa rōna, joaloka mofolisi oa rōna. Lipatala tse ling tsena tsohle ke libonase tse lefshoang ke pholisi ea inchorense. Amen. Le tseba seo pholisi ea inchorense e leng sona. U ka hula libonase tsa eona mohla e butsoang. Ruri. U ka hula libonase. 'Me hona joale re hula libonase. Feela, ntho e leng teng, hang ha re hula libonase, patala e boela e nyoloha.

⁶¹⁴ Moemeli oa ichorense, o itse ho 'na, ka mohla o mong, "Billy, ke batla ho u rekisetsa inchorense."

Ka re, "Ke na le eona." Mohatsa ka a ncheba.

⁶¹⁵ Joale, ha se taba e khahlano le inchorense. Empa batho ba bang ba "hloka inchorense." Ka hona, eaba ba retoloha. A re . . .

⁶¹⁶ Mohatsa ka a ncheba, a hloletsoe, "Athe u na le inchorense?"

⁶¹⁷ Ka re, "Ehlide." A sa tsebe letho ka eona.

⁶¹⁸ A re, “Be, Billy, u tšoere inchorense ea mofuta mong?”

⁶¹⁹ Ka re:

Tšepo e bokoang, Jesu oa me!
 Oh, tatso e khanyang e Mokhethoa!
 Mojalefa oa poloko, oa thekollo ea Molimo,
 O tsoetsoe ke Moea oa Hae, o hlatsue Maling
 a Hae.

⁶²⁰ A re, “Hoo ho hotle, Billy,” a rialo, “empa e ke ke ea u kenya setšeng sa bafu mona.”

⁶²¹ Ka re, “Empa E tla ntša teng. Ke eona taba ea seholho.” Ha kea khathatsoa ke ho fihla mono; ke khathalitsoe ke ho tsoa teng.

⁶²² ’Me esale ke rua kholiseho eo, e hlapantsoeng ke Molimo oa Bosafeleng, e re O tla boela a ntsosa ka setšoano sa Mora oa Oona, letsatsing la ho qetela, ke tla tsamaea ka sebete le ka tšepo ’me ke tšoere ankora ea moea, ka ho re, leha ke sa le kahare ho lesira lena Ntho e sa bonoeng e ankorile koana Lefikeng la mongoaha. Mohla metsi a tlolakang a qhomaka, ha e etse phapang ea letho. Leha e le lefu, linako tse bohloko, leha e le ntho efe, li ke ke tsa re arohanya le lerato la Molimo. Ankora ea ka e tšoere kahare ho lesira. Leha meroallo e ka kokomoha. Leha o ka khoroha. Leha ho hlaha bomosalumele. Molumeli ea tsoetsoeng labobeli o na le ankora. Le joale ha u eso khone ho bona ka lesira lena. Empa kea tseba hobane ankora ea ka e tšoere koana Lefikeng la mongoaha, e leng Èèna tšepiso e hlapantsoeng e reng O tla ntsosa ka letsatsi la qetelo.

⁶²³ Ha ho makatse ha u ka tjamela lefu, oa re, “Ebe tsenene ea hao e kae? Uena lebitla, ho hlola ha hao ho kae? Empa ho lebohuoe Molimo o re fang tlholo ka Morena Jesu Kreste oa rōna.” Re kahare ho Moetelli. Oh, khili! (Ha re sa tla finyella thuto rōna.) Re ile ra emeloa ke Moetelli.

⁶²⁴ Moetelli. Na le eleletsoe mehleng ea khale ea bophirima. Ke parotse litselana tseo tsa khale ka makhetlo. Moetelli, kapa pulamaliboho? Enereha makoloi a timela, a hloka metsi, pulamaliboho e ne e titimela pele. Ebe o bona merabe ea Maïndia; o ne a ba feta. O ne a bone moo seliba sa metsi se leng teng. Ebe o boea ho ea bolella moetapele oa makoloi, “Hlabang lipere ka liporo, mang le mang a kothale, hoba seliba sa metsi a mangata se teng ka nqane ho thaba.” Ke moetelli.

⁶²⁵ ’Me Moetelli, ke enoa. Motho o kile a thibelloa ke liabolosi, a le tlasa lethala la litholoana tse lehala, empa eaba e Mong o hapa selao sa machinikane. E ne e le Jesu. Moetelli o ile a re a re etella pele. Satane o ne a eme mono ka machinikane, a ntse a re hateletse, esale re kene bokhobeng re tšaba lefu. O ne a thibeletse Seliba seo. Ehlide, o ne a entse hoo. O kile arongoa joalo, kaha re ne re entse sebe ’me ra lelekhoa pela Sona. Empa Moetelli, Kreste, o ile a kena ’me a hapa selao.

⁶²⁶ Le utloile thoko eo ea mehleng, "Tiietsa qhobosheaneng, hoba kea tla"? Tiietsa qhobosheaneng, ha ho letho; ha re e hapeng. Ha re sa batla ho tiisetra. Kreste o hapile qhobosheane. Alleluia! Monyako o butsoe. "Seliba se teng se butsoeng ka tlung ea Molimo, motseng oa Davida, ho hloekisa, ho hloekisa ba sa hloekang." Moetelli oa rōna o se a kene sebakeng sa rōna.

⁶²⁷ Moetelli, O a re bolella, "Sebaka se teng ka nqane, koana, teng ha le sa tla tsofala." Moo masoebe a leng sieo, mono ha u sa tla sebelisa Max Factors ho u intlafaletsa mohatsa'o. Moetelli o eteletse pele. Ha se moo u tla tsofala o khathala o thothomela. E teng tulo moo u sa tl'o kula. Teng lesea ha le sa tla jeea ke mala. Teng ha u sa tla kgenola la bohata... kapa leino, ho kenya la maiketsetso. Alleluia! Oho ho bokoe Lebitso la Hae! O kene kahare, 'me re tla ema ka setšoano sa Hae re sa shoe, ka letsatsi leo koana. Ba tla phatsima ho feta linaleli le letsatsi. Ruri. Moetelli o re eteletse pele.

...moo Jesu a ileng, o keneng ka baka la rōna, ha a
beoa moprista e moholo ka ho sa feleng, ka mokhoa oa
Melkisedeke.

⁶²⁸ Moetelli e moholo enoa o re eteletse pele, ho lokisa tsela. O tsoile seboprehong sa moea, lilibeng tse kholo tseo tsa mookoli oa Molimo, ea neng a se na qalo kapa qetello. E ne e le eēna, Molimo, kamehla.

Lehlaseli lena la Leseli le ile la betseha. E ne e le lehlaseli la lerato, ke lona le ka seholohong, bofubelu. 'Mala o latelang, e ne e le bolou; bolou, botšepehi. Le latelang, mono ho hlahlama mebala e meng, ka mebala e phetheleng e supileng, e leng meeaa e supileng ea Molimo, e tsoileng Selibeng se seholo kapa Taemaeng e kholo eo Jesu a buileng ka eona. Taemane e kholo eo e ile ea khephola, morero e le ho halimisa mebala ena. Molimo o ne o etsoe nama oa aha hara rōna, hore A tle a halimise ho loka ha Oona le mohau hara rōna, ka lineo le ka lipontšo le ka meeka.

Mookoli o moholo o sekōlōkōtō o ne o fetohile theofani, e entsoe ka sebopreho sa motho. Athe, E ne e se monna; O ne a eso etsoe nama, le joale. E ne e le theofani.

⁶²⁹ Moshe o boletse, "Ke rata ho U bona." Eaba Molimo o mo pata kahare ho lefika.

⁶³⁰ Eitseha A feta, A hlahisa mokokotlo oa Hae. Moshe o itse, "E ne eka mokokotlo oa monna."

⁶³¹ Eaba ho etsahla'ng? Ka tsatsi le leng tlase mono, mohla Abrahama a lutseng kahara tente ea hae. Re tla kena ho eona, bosiusg bona. Mohla Abrahama lutseng kahara tente ea hae, eaba Molimo o fihla ho eēna, ka 'mele oa nama.

"Oh," u re, "Moena Branham, e ne e le . . ."

⁶³² Re tla Mo fumana kantle mona a kopana le Abrahama pele ho moo, ka mokhoa oa Melkisedeke, ka 'mele oa nama, athe e ne e le Molimo. Ehlide, e ne e le oona. E ne e le Molimo ka nama.

⁶³³ U re, "Hape, Moena Branham, hobaraneng A ne a tlameha ho khutla a boele a tsoaloe?"

⁶³⁴ Mohlang oo O ne a sa tsoaloa. O ne a bopiloe feela, 'mele oo A neng a ahile kahare ho ona. Melkisedeke e ne e le Morena oa Saleme, e leng Morena oa Jerusalema, e leng Morena oa khotso; a se na ntate leha e le 'mè, qaleho ea matsatsi kapa qetello ea bophelo.

Jesu o ne a ena le ntate le 'mè, le qalo ea matsatsi le qetello ea bophelo. Empa O ne a entsoe "ka mokhoa" oa Melkisedeke, ea neng a se na qaleho ea matsatsi kapa qetello ea bophelo.

⁶³⁵ Melkisedeke e ne e le Molimo Boona. Melkisedeke e ne e le Jehova Molimo, Oona o kopaneng le Abrahama, lilemo hamorao, ka pel'a tente ea hae. O ne a mo neile sekotlo sa Hae; O itse, "Sara o tshile keng?" Ke hantle. Ke Oona o neng o eme mono, a shebile nq'a Sodoma. Abrahama o Mo eleletsoe, kaha kahare ho lesira lena ankora e ne e tsoere pallo eo. Hase ka hoba a utloile tshisimoho ea mofuta, empa Molimo o ne o mo etselitse pallo. 'Me eitseha a kopana le makenete o moholo oo, o tsebile hoba E ne e le nama eo.

⁶³⁶ O ile a tsoa a tsamaea le Abrahama, nakoana kantle mono. A bolella Abrahama. Ha thoe, "Haeba ho le joalo, na Nka patela Abrahama lintho tsee, haele moo e le mojalefa oa lefatše? Nke ke ka etsa joalo." Ka hona, "Abrahama, Ke tla u bolella morero oa Ka oa ho nka leeto la Ka," re tla e thonaka bosiu bona, "tlase mono kahare ho Sodoma," le seo ba neng ba tla se etsa bohle. 'Me hang hoba A hlonolofatse Abrahama, A boela a khutlela sebakeng. Monna ea neng a eme mono liparo tsa Hae li tletse lerôle, monna. 'Me ha se ho fela, empa O jele nama ea namane e hlajuoeng ke Abrahama, a ba a noa lebese la khomo, a ja linkhoana (bohojana ba koro), bo tšasitsoe sereleli. Ke hantle haholo. Eaba o boela a khutlela 'meleng oa theofani.

⁶³⁷ Ebe e ne e le eng? Horeng A sa e nka mohlang oo? O ne a sa tsoaloa joaloka 'na le uena. Empa O ne a tlamehe ho tsoaloa ka nama, A tle a khone ho tsetela tsenene eo. Oo e ne e le 'mele o bopiloeng. Ke 'mele oo A o teantseng feela ka khalsiamo le ka pothashe e tsoang lefatšeng, oa re, "Whiu," eaba o kena kahare ho ona. Melkisedeke o ne a le joalo. O ile a kena kahare ho eëna, ka 'mele oo A neng a ka tsoa a tsamaea ka pela hae tlasa lesira, ka lesira la popo ea Hae ka sebele; e seng ka lesira la popo ea mosali, ka popelo ea mosali, ka e—e sele, lekhale. Empa ke Oona o bopileng ona oa ntano kena kahare ho ona, oa bua, ka mokhoa oa Melkisedeke.

⁶³⁸ Melkisedeke enoa ke mang?

Ke Melkisedeke eo, morena oa Saleme, (e leng Jerusalema), le khosana ea Molimo o moholoholo, ruri, ea neng a ee ho khahlanjetsa Abrahama mohla a neng a sa tsoa qhala marena, a ba a mo hlohonolofatsa;

Ke eèna eo Abrahama a bileng a mo abela karolo ea leshome ea tsohle; eo mabitso a hae ha a fetoloa la pele le reng Morena oa ho loka, (lerato le leholo leo, lerato, Moea o moholo oo qalong) . . . Morena oa ho loka, . . . bobeli le . . . Morena oa Saleme, e leng ho re, oona Morena oa khotso;

Ea se nang ntatae, le 'ma'e, ea se nang le leloko, leha e le qaleho ea litšiu, kapa eona qetelo ea bophelo; . . .

⁶³⁹ E ne e le mang? Ha A ka a tsoaloa, A ke ke a shoa le ka mohla. E ne e le mang? E ne e le Molimo, ehlile, e ne e le oona, koana liriting tsa Morena Jesu. Ruri bo e ne e le sona. Empa O ne a tlamehe ho tla ka mosali, joaloka ha le uena u tlide ka mosali. 'Me A tlameha ho tla ka moo le uena u tlide, a tle a u khutlisetse ho Èèna. Alleluia!

Mohau o hlollang, molumo o monate,
O pholositse mofo, 'na ea soto ea sefotfu!
Ke na be ke timetse, ke thotsoe, ke mohau oa
Hae,
Ke foufetse, joale kea bona.

⁶⁴⁰ Ke utloisia seo A neng a tlamehe ho se phethisa. Molimo o fetohile 'na, hore 'na ke fetohé Èèna ka mohau. O nkile libe tsa ka, hore 'na ka ho loka ha Hae ke rue Bophelo Bosafeleng. Ne nke ke ka ikhethela. Tlhaho ea ka e ne e le moetsalibe. Ha kea amana le eona ka letho. Ke "tsoetsoe ke lefatše, ke bopetsoe bokhopong, ke tlide lefatšeng ke bua mashano." Ho se le monyetla oa letho, ho hang; ho se letho, leha e le takatso.

⁶⁴¹ Ako boelle kolobe hore e "phoso, e ja pheqe-pheqe," na u ka khona? Ako shebe na e tla u mamela ha kae. Bolella lekhoaba hore le "phoso, le ja setopo se shoeleng," 'me u bone le tla u araba joang. Hola le ka bua, "Shebana le litaba tse u tlamang." Ruri.

⁶⁴² Oh, empa mohau oa Molimo o fetotse tlhaho ena, oa mphamonyetla oa ho lakatsa le ho labalabelo le ho nyoreloa, "Lerato la Hao, ho loka, ho 'na ho fetisa le bophelo, oho Molimo. Pelô ea ka e tla tsetselela Uena."

⁶⁴³ Davida o itse, "Joaleka khama ha e tsetselela metsi a molatsoana, moea oa ka o nyoretsoe Uena, oho Molimo."

⁶⁴⁴ Ke Molimo o neileng motho lenyora leo, ho Mo khumamela, ho rata, ho Mo batla. Empa motho o le khopamisa ka pitso ea liabolosi, 'me o a tloha o lakatsa basali le menyaka le lintho tsa lefatše, ho leka ho khotsotsa popo e halalelang eo Molimo o e kentseng kahare, ho Mo rata. O e tsetleha holima lintho

tsa lefatše. Empa, moena, hang hoba a fetoloe, 'me seliba seo se tletse libokoana, mekhoa eohle ea—ea lemena e sa lokang, e hlatsoitsoe e ntsitsoe 'me e hloekisitsoe, 'me ka mono ho tsetsoe Metsi a Molimo a se nang sekoli, sebe ha se sa tla se ama. Amen.

Oho ke Mo rata joang! Ke Mo adora joang!
 Ke 'phelo ba ka, 'seli la ka, tsohle ho 'na!
 'Mopi e moholo e bile Moloki oa ka,
 'Me bottlalo bohole ba Molimo bo ahile ho
 Eèna.

O theohile khanyeng ea Hae, pale ea kamehla,
 Molimo oa ka le Moloki o tlide, Lebitso la Hae
 e le Jesu.

O hlahetse sejelong, osele ho ba Habo,
 Molimo oa tshotleho, likeleli le hlomoho.

Oho ke Mo rata joang! Ke Mo adora joang!
 Ke 'phelo ba ka, 'seli la ka, tsohle ho 'na!

⁶⁴⁵ Oho Molimo! O be A ka e etsa joang? Esale motho a leka ho ngola ka eona. E mong o itse:

Hola re ka tlatsa leoatle ka enke,
 Hlokoana ka leng fatše e le lesiba;
 Maholimo ohle e ka ba matlalo,
 Mang le mang e be mongoli ka khoebo,
 Ho ngola lerato la Molimo holimo.

Kamoo Molimo o moholo oa Leholimo o fetohileng nama
 'me oa nka libe tsa ka!

Ho ngola lerato la Molimo holimo
 Ho ka omisa leoatle khere;
 Na ebe lengolo le ka ngola tsohle,
 Leha le sarolloa sebaka le sebaka.

⁶⁴⁶ 'Me ho kholisisa majalefafafa a poloko ena ka tšepo e tiileng, o hlapantse ka Oona ha thoe O tla boela a tsoha matsatsing a bofèlo, ho re nea Bophelo Bosafeleng. "'Me ha ho ea ka ba utlang letsohong la Ka." Amen.

Ha re rapeleng.

⁶⁴⁷ Na u jere molato oa ho latola lerato la Hae? Na u hanne Boleng ba Hae bo bokoang, e moholo Enoa ea u entseng seo u leng sona? 'Me joale ke uena enoa, hoseng hona, u tsamaile bohole bona bophelong, 'me o fuoa monyetla. Na u batla ho tsoelapele ho phela? Mokhoa oa ho phela o mong feela, ke ka ho lumela ho Morena Jesu. Haeba uena, ho tsoa pelōng ea hao, u Mo lumela e le Mora Molimo 'me u Mo amohela e le Moloki oa hao, le ho lumela hoba Molimo o Mo tsoselitse tokafatso ea hao, ha u batla ho e amohela holima motheo oo, ke ea hao hona joale.

⁶⁴⁸ Na u ka phahamisa letsoho la hao? Moea o itseng o sa bakang, o ka ratang ho sokoloha hoseng hona, o reng, "Nkhopole, moena, moreri, re sa ea rapela. Le 'na ke sitiloe. Ke ngolise le kerek,

empa ke—ke itseba ke—ke eso fumane seo u buang ka sona. Ha ke eso tsoaloe ke Moea oo, Moena Branham. Ke mpa—ke mpa ke se na Oona, ho hang. Ke batla u nthapelle, Molimo o tle o mphe Oona hoseng hona.” Molimo a u sitse, monghali. E mong a ka ba teng? Ea reng, “Molimo, nketse seo U mpatlang ke le sona. Ke U batla ho ba . . . Ke ipatla ho ba seo U mpatlang ke le sona. Ke hanne lerato la Hao.” Molimo a u sitse, mora.

⁶⁴⁹ Nakoana feela joale.

Hola re ka tlatsa leoatle ka enke,
Leha maholimo e ka ba matlalo;
Hlokoana ka leng fatše e le lesiba,
Mang le mang ebe mongoli ka khoebo;
Ho ngola lerato la Molimo holimo
Ho ka omisa leoatle khore;
Na ebe lengolo le ka ngola tsohle,
Leha le sarolloa sebaka le sebaka.

Oh, lerato le Molimo, le enne le hlakile!
Le tebile le matla a hlolang kutlo!
Le tla hlola kamehla eohle,
Thoko ea bahalaleli le Mangeloi.

⁶⁵⁰ Molimo o ratehang, ruri seroki se ngotseng mantsoe ao se etsisitse balumeli ba Hao, ba neng ba batla, ba leka ho ho le hhalosa ka mantsoe. ’Me ho ngoliloe Bibeleng, “Hape, ’moleli o ne a le bohlale, a botsisia a lokisa lipuo tse ngata.” Oh, re ka rata hakae ho fumana leleme le eona tlötontsoe ho hhalosetsa batho seo le leng sona ruri, empa hase taba e ka fihlelang melomo ea motho. Bosafeleng bohle, ha ke kholoe bo tla qetella bo senotse hoo, ka moo Molimo oa Leholimo o kileng oa theohela lefatšeng ho pholosa mofutsana, ea lahlehileng, baetsalibe ba soto.

⁶⁵¹ Kea U rapela, Ntate, ka mantsoe a ’maloa ana a sa khaohanang, kapa ka mantsoe a khaohaneng ana hoseng hona, ke tlamehile ke be ke itsalo, e ke ebe e mong o fumane khotsa le khotsafalo le tšeliso e matla, e leng ea phallelang setšabelo seo. Meea ea bona e ankore pallong eo Molimo o hlapantseng ka eona, e reng O tla boela a ba tsosa ka letsatsi la ho qetela. Matsoho a ’maloa a phahame, ka moahong, hantle kahara tabernakele ena. Molimo, ba abele tšepo e tiileng eo, hona joale. Ba ke ba ankore koana Lefikeng la mengoaha. Leha leoatle le ka bëfa hampe la qhommakisa seketoana sa bona, ba na le tšetleli, pallo ea Molimo. Ba ke ba tiisetse mono, “Molimo o E buile. A ke ke a etsa leshano.”

⁶⁵² “Ea utloang Mantsoe a Ka,” ao ke lekileng ho a rera hoseng hoseng hona, “’me a lumela ho Ea Nthomileng, Jehova, o na le Bophelo ba kamehla; ’me a ke ke a tla kahlolong, empa o tlohile lefung ho kena Bophelong.”

⁶⁵³ Oho Uena Mohlolehi, hlohonolofatsa bao kajeno. Motho mang le mang ea seng tlasa Mali ka mona, meeaa ea bona eso

sokolohe, e ke e etsahale hona joale feela, Morena. Sephiri se etsoe ke Uena. Ke taba ea Hao kahohle. E laeletsoa ho Uena. Ke U rapela ho ba abela bona, Bophelo Bosafeleng. Ho ke ho etsoe, ka tsatsi le leng, koana lebopong lèla, haele moo re feta khohlong eo ka bonngoe ka bonngoe, re ke re kopane mane moo re sa tl'o hlola re re “tsamaea hantle” hape.

Re tla fihla lelibohong ha ho phirimile,
Mohla ho felileng mehopolo ea mahlomola;
Moemeli o tla nkemela ho re supisa tsela,
Nke ke ka tšela Jorodane ke le mong.
E Mong, o tla nkemela ho ntšupisa tsela,
Nke ke ka tšela Jorodane . . .

⁶⁵⁴ Bohle ba ruileng tšepo eo, phahamisa letsoho la hao joale u sa phahamisa hloho ea hao.

Nke ke ka . . .

Joale u Mo khumamele feela. Molaetsa o fetile. Ha lea thaba na? Molimo o hlapantse O itse o ke ke oa . . . Molimo o hlapantse O itse o tla kopana le uena mono.

Jesu o shoetse pheko ea libe tsa me;
'Fifing le thata le . . .

U reng? Tsenene e fohtotsoe.

U tla nkemela bo,
Nke ke ka tšela Jorodane ke mong.
Leha ke furalloa, ke imetsoe . . .

Mo khumameleng joale.

Le metsoalle e se ntetse bo;

Na u kile ua fihla moo?

Khopolo e bokoang e teng.

Pallo e ne e le efe?

E thabisang pelō,
Nke ke ka tšela Jorodane . . .

⁶⁵⁵ Joale, lona bana ba pallo, le Mo khumamele haele moo a entse hoo.

Nke ke ka tšela Jorodane ke mong,
Jesu o shoetse pheko ea libe tsa me;

Ho etsahala'ng joale?

'Fifing le thata hle, U tla nkemela bo,
Nke ke ka tšela Jorodane ke le mong.

“Ha ke fihla lelibohong.” Mang le mang oa lona o tla fihla. Ka pel'a hao, ho larile seriti se seholo se fifetseng. Ke monyako o moholo. U tlil'o kena ka mono, le leng la matsatsi ana, ekaba le pele letsatsi le likela, ekaba le pele kereke e qhalana hoseng hona. U tlil'o kena ka mono. Nako le nako ha pelō ea hao e otla, u atametse ka bohato bo le bong.

'Fifing le thata hle, U tla nkemela mono,
 O itse O tla etsa joalo. O hlapantse A tla etsa joalo.
 Le hona nke ke ka tšela Jorodane ke le mong.

⁶⁵⁶ Oho Morena ea bokoang, lipelō tsa rōna li tletse, hoseng hona, hoo li phophomang.

⁶⁵⁷ Ho nahana mohla mothapo o khaotsang ho thanya, 'me mooki o hatella hloho ea hao ka mosamo. Le matsoho a hao, ha u sa khona ho a tsamaisa. Matsoho a hao a qhoahafetse. Bana ba hao, 'mè oa hao, baratuoa ba hao ba hooeletsa ba lla. Monyako o moholo oo o a buleha, koana. O tla be a eme.

⁶⁵⁸ Davida o itse, "Leha nka ala malao a ka liheleng, le mono O tla ba teng." Nke ke ka tlameha ho e tšela ke le mong. Mohla mechaeli ea noka e qalang e chabela sefahleho sa rōna, Molimo o tla nka sekepe sa bophelo, a re tšelise eona ka tšoanelo. O tšepisitse A tla e etsa. Moporofeta Davida o itse, "E, leha nka tsamaea khohlong ea moriti oa lefu, nke ke ka tšoha bobe leha bo le bong. U na le 'na. Lere la Hao le seikokotlelo sa Hao, ke tsona tse ntšelisang."

⁶⁵⁹ Morena, re thabile haholo kajeno, ha re entsoe majalefa a pallo. Kajeno ka ho rōna re ruile Bophelo Bosafeleng, hobane re rata Morena Jesu re bile re lumetse ho Eèna, re amohetse Lentsoe la Hae le thuto ea Hae. 'Me O re nea, joaloka tiiso ea tumelo ea rōna, Moea o Halalelang, tiiso ea Moea o Halalelang. Tumelo e kahare ho rōna e ankoriloe. Leha ka linako tse ling re tsamaea hara meriti e lefifi, hangata re khothometseha tseleng, empa koana tsetleli ea rōna e tšoere. Ntho e 'ngoe e teng, koana, e bonahalang e laola, e ntse e re, "No tsamaee. Re ntse re tsoelapele."

⁶⁶⁰ Molimo, o re hlohonolofatse. Rea U hloka. Re boloke re tšepahetse re tīle hofihlela U tla re lata, re tla U roris ka mengoaha e sa khaotseng. 'Me ka tsatsi leo mohla re emang holima lefatše... Maoto a Hae a bokoang ha eso hate holima le hona. Ke eo O eme mono, sebakeng; 'me bahalaleli le balopolloa ba mengoaha eohle, tebelong ka 'ngoe, ea pele, ea bobeli, ea boraro, ea bone, ea bohlano, ea botšeleta, le ea bosupa, bohole ba eme mono ba apere ho loka ha Hae; re Mo roesa moqhaka ka tlotlo ea Khosi ea khosi le Morena oa marena, le ho bina lipale tseo tsa topollo. Lipelō tsa rōna tse tetemang li tla thothomela mohla re talimang Èo ea re ratileng le ea Inehetseng rōna. Enere re sa ratehe re le baetsalibe, Kreste o shoetse ho re pholosa. Re U leboha ka eona, Ntate, ka Lebitso la Kreste. Amen.

⁶⁶¹ Lea Mo rata na? Oh, O tiile hakae. Ana ha u lakatse ho Mo harela ka liphaka tsa hao feela? Ana ha u batle ho khasa u ame maoto a Hae, u a tseba?

⁶⁶² U a tseba, batho ba teng ba neng ba tloaetse ho etela litsebeletso tsa ka Phoenix, Arizona, ho thoe, "Ke batla ho qoqa

litaba le Eèna. Ke rata ho re, ‘Morena, U nthatile mohla tsela ea ka e ne e rothofala haholo.’” Ke rata ho lokisa litaba le Eèna pele re tšeleta mose oane. Ke—ke batla ho Mo bona. Ke—ke—ke batla ho ’Mona feela. Kea nahana ebe ke tla ikutloa joang, ka moo pelō ea ka e fokolang e tla thothomela mohla ke ’Monang aeme mono.

⁶⁶³ Ke ipotsitse khafetsa, “Eka nka be ke utloile Puo eo e reng, ‘Tloong ho ’Na, lona bohle ba khathetseng ba imeloang. Ke tla le fumanela phomolo.’”

⁶⁶⁴ Mohlomong nke ke ka Mo utloa a bua joaloka mohlang oo ka namana, empa ke batla ho Mo utloa a re, “Lena ke letsatsi la ho qetela. U sebelitse hantle, mohlanka ea khabane ea tsepehang, joale kena menyakeng ea Morena e lokiselitsoeng uena.” Ho tloha neneng?

⁶⁶⁵ “Ho tloha mohla u ne u pholosoa?” Che moena.

⁶⁶⁶ “Ho tloha motheong oa lefatše, mohla Ke ne ke u bona le ho u tseba esale pele, le ho u khethela Bophelo Bosafeleng,” u ne u hlohonolofatsoe mohlang oo. “Bohle bao A ba tsebileng, O bile o ba bitsitse.” Na ho joalo? [Phutheho e re, “Amen.”—Mong.] “Bohle bao A ba bitsitseng, O ba beile ba lokileng. Bao O ba beileng ba lokileng, O bile o ba tlotlisitse.” Ke moo he. O re tsebile pele, oa re bitsa, oa re bea ba lokileng, ’me re se re tlotlisitsoe le Eèna ’moho, bofelong ba lefatše, re habile moputso oa rôna. Ha lea thaba na? [“Amen.”] Ehlile. E tla u ratsisa Eèna. Mohla u neng u sa khone ho ithusa, ’me ke enoa A fihla a u etsetsa eona.

⁶⁶⁷ *Ho Bokoe Tlamo E Tlamang*, Khaitseli Gertie. “Lipelō tsa rôna ka lerato le Bokreste,” re sa kene setsoalleng se se nyenyane sena sa thoriso hona joale, re ntano rapella bakuli. Molimo o le hlohonolofatse. Lona ba phahamiseltseng matsoho a lona ho Kreste hoseng hona, iphumanele sebaka sa ho rorisa, ho Mo sebeletsa.

⁶⁶⁸ Joale, ha re Mo roriseng joale, phutheho eohle, lona Bamethodise bohle, church of God, Assemblies of God, Mapresbeteriene, Maluthere, Katolike. Hammoho joale, ha re bineng joale.

Ho bokoe tlamo e tlamang
Pelō tsa rôna ka lerato la Mokreste;
Setsoalle sa mehopolo eo
Se tšoana le sa Holimo.

Pel'a terone ea Ntata rôna,
Re tšolla thapelo ea rôna ka cheseho;
Tšabo tsa rôna, tšepo ea rôna, lipheo tsa rôna,
se seng,
Tšeliso ea rôna le paballo ea rôna.

Koana ha re arohana,
Re hlabehehahare;
Empa re tla lula re teane ka . . .

Ke Bamethodise ba bakae, Mabaptise, le bohle?

Re ntse re tšepile ho boela re kopana.

⁶⁶⁹ Na ha e le thabise? Ha re retoloheng re tsukutlane ka letsoho joale, re sa se bina hape.

Pel'a . . .

Ha re tsukutleng matsoho, le motho ea ka mora hao, ka pele ho uena, ka lehlakoreng lefe feela.

. . . terone,

Re tšolla thapelo ea rōna ka cheseho;

Tšeliso tsa rōna le paballo ea rōna.

Joale koana ha re arohana,

Re tla ratana.

Re hlabeha . . .

Ekare tšebeletso e ka tsoelapele? Ua bona? Re hlile re nahana joalo.

. . . hlabeha kahare;

Empa re tla 'na re teana pelōng, ka bonngoe,

Re tšepile ho boela re teana.

Ha e se mona, re tla teana ka Letsatsi le leholo leo.

⁶⁷⁰ Joale, Ntate, amohela thoriso ea rōna hoseng hona. Nka Lentsoe u Le jale lipelōng tsa balumeli. Ba se tjebeloe koana le koana, kajeno ba eme ba oele hosane, empa Mantsoe ana a ke a fumane nqalo ea phomolo pelōng ea molumeli e mong le e mong. Ho tseba sena, ho re, "Molimo o hlapantse ka kano, 'me lintho li peli tse sa sisinyeheng. Ho se sisinyehe ha Molimo, ke hore, ha ho ka moo O ka etsang leshano, hore majalefa a pallo ena a tle a fuoe tšepo e matla ena, tiileng le e kholisehileng, ankora e kahare ho moea." Ho tseba sena, ho re, "Molimo o re tšepisitse, ka kano e hlapantsoeng. E 'ngoe, hore O ke ke oa etsa leshano; e 'ngoe, O hlapantse ka kano e phaellang moo, e reng O tla re tsosa ka letsatsi la bofelo oa re nea Bophelo Bosafeleng." Ho tseba, ho re, "Hoba re bitsoe, O itse O re tsebile le pele ho theoa lefatše, oa re rerela ho beoa bana ka Jesu Kreste. 'Me O re tsebile pele. O re bitsitse. 'Me hoba A re bitse, O re beile ba lokileng." Re ka sitoa ho ipea ba lokileng, ka hona O re beile ba lokileng ka lefu la Mora oa Oona ka sebele. "Bao A ba beileng ba lokileng, O bile o ba tlotlisitse." Lentsoe le se le builoe. 'Me re leetong la rōna feela, re tsamaea joalo, re thabile leetong la rōna le eang Khanyeng.

⁶⁷¹ Nea batho tumelo, 'me litloaelonyana le lintho tse leketlileng holima batho, ba itšoasolle ho tsona, hoseng hona, ka Lentsoe lena la Molimo e leng ankora ea moea, e tiileng le e matla. Ba hlohlore litloaelo tsa bona, mabifinyana a bona. Le lintho tseo esale . . . Joalokaha Pauluse a itse, tsamaong ea molaetsa matsatsing a 'maloa, "Are ke re lahleng hohle ho re

imelang, le sebe se re tšoasang feela, 'me re ke re mathe ka sebete peisong eo re e beetsoeng; re ntse re talimile moqali le mophethi oa tumelo ea rōna, Jesu Kreste, Ea lekiloeng ka hohle joaloka rōna, feela ha a etsa sebe.' O ile a tloheloa ho lekoa, A mpa a se ke a ineela moleko. Le rōna re lekoa ho etsa sebe, empa le ka mohla ha re ineele. Hobane Bophelo ba kahare ho rōna ke ankora ea mafinyello a rōna a Bosafeleng, 'me hoo re ho baballa ho khethehile pelōng ea rōna.

⁶⁷² Joale, bongata bo hlomolisitsoe ke Satane ka mahloko. Re itokisetsa ho ba rapella, Ntate. A bona, ha ba feta tlasa Lentsoe la Molimo kajeno... Lentsoe le thekothata leo le reriloeng, Bibele e ntse e le pakela, Mangeloi a Morena a eme haufi, le Moea o Halalelang o moholo, holima lintho tsohle, o eme mona ho pakela Lentsoe. Joale, Ntate, e re ba sa feta tlasa Lentsoe la pallo, hoseng hona, ba tlohe mona ho ea fola. Ho hlohlolla lisamente tsa bona, ho siea litulo le—le mealo esale ba robala holima eona, le ho phekoloa feela. Aba sena, Morena. Ba khutle tšebeletsong e latelang eo ba lumelloang ho e etela, kapa likerekeng tsa bona, ba nyakaletse, ba supa lintho tse kholo tseo Kreste a li entseng. Sena re se hlahisetsa tlotliso ea hao, ka Lebitso la Jesu. Amen.

⁶⁷³ Ke tlameha ho kopa tsoarelō ka tšepiso eo ke e entseng, e reng hoseng hona re tla tšoarana le khaolo ea 7, empa ha kea e finyella. 'Me re tlameha ho khetha nakoana bakeng—bakeng sa sena, bakeng sa mola oa thapelo. 'Me joale, bosiu bona, ha Morena a ratile, re tla nka khaolo ea 7, le ho fumana na Melkisedeke enoa e ne e le mang. Ba ratang ho tseba ba bakae? Oh, re theohela ho Eèna hantle feela, ho fumana hantle na Ke mang. 'Me Lengolo lea re bolella na Ke mang. Ua bona?

⁶⁷⁴ 'Me Scofield o itse e ne e le "boprista." Ebe e ne e ekaba boprista joang, bo se nang qaleho le qetello? U a bona, e ne e se boprista. E ne e le Monna, Melkisedeke (lebitso), Motho.

⁶⁷⁵ Ho kang, ha ke seholle, empa Christian Science e re Moea o Halalelang ke "monahano." Athe Bibele e itse, "Eèna, Moea o Halalelang." 'Me Eèna ke leemeli la motho. Ke Motho; e seng monahano. Ke Motho. Ruri bo.

⁶⁷⁶ 'Me Melkisedeke ke Monna, Monna ea neng a se na qaleho ea litšiu kapa pheletso ea lilemo. O ne a se na ntate kapa 'mè, kapa leloko. 'Me re tla fumana hore Ke mang, ha Morena a ratile, bosiu bona, ka Lentsoe. Lea Le rata na? [Phutheho e re, "Amen."—Mong.] Oh! "Lentsoe la Hao ke lebone tseleng ea ka le maotong a ka." Oh!

⁶⁷⁷ Joale, u re, "Moena Branham, ha ke E utloisise kaofela." Le 'na ha ke khone.

⁶⁷⁸ Empa, ka mohla o mong, ke ne ke rera tlase Kentucky. 'Me ho lona ba ttileng bocha, le Makatolike le ba fapaneng, ekaba ha le utloisise lintho tse tebileng tsena, lintho tse enneng tsa

Lengolo. Esale ke rera ka pholiso ea Khalalelo. Ngoanana ea sa roalang lieta maotong o ile a tlisa... A sa etse le lilemo tse leshome le metso e mehlano, a ena le lesea, le jeoa ke phalsi. Ka re, "Molato ke ofe, khaitseli, ka lesea la hao?"

⁶⁷⁹ Ha thoe, "Le a reketla." A sa tsebe seo ka se buang, phalsi. A sa tsebe a ka e bitsang.

⁶⁸⁰ Mothoana oa batho ekaba a eso fumane para ea lieta, bophelong ba hae. E le moratuoa oa monna ea itseng, moriri o molelele o lepeletse. Ka re, "U a lumela na?"

⁶⁸¹ Eaba mahloana ao, a boputsoana ba setala a ncheba. A re, "Yaa, monghali. Ke hlile kea lumela."

⁶⁸² Ka nka leseanyana. Eare ke sa le rapella, la lesa ho thefuleha. Uh-huh. 'Me la tsoa, la tsoa.

⁶⁸³ Letsatsi le hlahlamang, ke ne ke tsoma sehlora, koana mosikong oa thaba. Ka utloa banna ba lutseng mono ba ntse ba qoqa, saga ea khale e hobang. Ka nanya ke theoha. Esale ke tsoma sehlora. Ba ntse ba bua ka 'na, ba lutse mono, ba hlafuna koae ba ntse ba tšoela. Mahlaku a ntse a fokaela, joalo. 'Me ba ntse ba qoqa, joale, ka kopano ea bosiu pele ho moo. E mong oa bona a re, "Ke bone lesea leo. Ke fetile mono, hoseng hona. Ha le sa thefuleha, hoseng hona." Ua bona? Ho re, "E ne e le ntho ea mannete." 'Me a ntse a tšoela mathe.

⁶⁸⁴ 'Me keha ba tšetlehile lithunya tsa bona ka sefate, ka hopola ho itsebisa ke hona. U a tseba, ho ne ho qhomme liqabang tlase mono, hape. Ka baka leo, ka tsamaea ke nyoloha. Ka re, "Malume hoseng, baena."

⁶⁸⁵ Mothakahali eo, ea kang o ne a bua, keha a momme koae molomong oa hae, ka mokhoa oo, khoneng ka tsela eo, a le molalahali, o molelele. A bile a roetse katibahali, e khohlelitsoe sefahlehong sa hae. A retoloha a ncheba. A nanabela a tsoara katiba eo, a e rutla a e rola, ho re... [Moena Branham o a koenya—Mong.] A koenya koae eo e hlafunoang, ho re, "Lumela, moruti." Ua bona? E, monghali. Hlompho. 'Me hoo ho lokile. Hore u phetse joang, ha ke tsebe, empa o khonne.

⁶⁸⁶ Ka hona, bosiu bo latelang, ha ke khutla, teng keha ho lutse monna ea batlang ho ngagisana le 'na nakoana. A tsamaea kereke e sa lumeleng pholiso ea Khalalelo. Ka baka leo, ena e ne e le kereke ea Methodise, White Hill, Kentucky. Ka hona a—a tloha a ea ho... O ne a eme kantle. A tšoere lantereme letsohong la hae. Eaba o re, "Ke batla ho bua taba, moreri. Ke mpa feela ke sa amohela Hoo, kaha ke sa khone ho E bona."

⁶⁸⁷ Ka re, "Ha u khone ho E bona?"

⁶⁸⁸ A re, "Che." Ho re, "Ke monna ea kulang, ka bonna. Empa," ho re, "Ke mpa feela ke sa E bone."

Ka re, "U lula kae?"

A re, "Ka morao koana Big Renox."

Ka re, “Be, u tla fihla joang hae?”

A re, “Be, ke tla tsamaea ka maoto ho ea fihla hae.”

Ka re, “Na u bona lehae la hao?”

A re, “Che, monghali.”

Ka re, “Ho lefifi haholo bosius bona, maru a thibile.”

A re, “E.”

Ka re, “U tla fihla joang hae?”

A re, “Ka lantereme ena.”

Ka re, “Lantereme ha e khantše tsela eohle ho fihla tlung.”

Ka re, “U tsamaea joang?”

A re, “Oh, ke tsamaisoa ke lantereme.”

⁶⁸⁹ Ka re, “Ke eona. Joale u tšoere leseli la lantereme, ’me nako le nako ha u tsamaea o ea nq’*a ena*, leseli le tla ’na le khantsa ka pel’*a hao*. Ha u ka lula u tsamaea, leseli le tla lula le tsamaea le uena.”

⁶⁹⁰ Le hoseng hona u etse joalo, ha u batla Kreste, Moprista e Moholo ea phahameng, ’Muelli oa maloetse a lona, kapa mahloko a lona, kapa oa moea oa lona. Mohlomong ha u E utloisise. Le rōna ha re khone. Empa re laeloa ho “Tsamaea Leseling joalokaha le Oona o le Leseling.” Hata khato e le ’ngoe kahara Leseli. ’Me ha u tšoere Leseli ho uena, Leseli le tla bonesa ho fihla letsatsing le phethehileng. Le tla u tsamaisa tseleng e ka pel’*a hao*.

Re tla tsamaea ’mila ona oa khale o moholo,
Ha ke phetse ho bolela hohle,
Mpe ke be Mokreste oa sekhaleng, Morena,
Ho feta sohle seo ke se tsebang.

Na le kile la utloa thoko eo ea khale?

Ha ho letho ho bapisoa le Mokreste oa sekhaleng,
Ea halimisang lerato la Bokreste;
Re tsamaea ’mila ona oa khale o moholo,
Ha re phetse ho bolela hohle,
Mpe ke be Mokreste oa sekhaleng, Morena.
Ho feta sohle seo ke se tsebang.

⁶⁹¹ Ke mpa ke e rata. Ho lokile. Joale re tla rapella bakuli. Ha rea... Ha re ipolele bokhoni ba ho folisa bakuli. Holane re etsa, ekabeba re bua phoso. Motho mang le mang ea kulang ka mona o se a folile. Lengolo le itsalo. “Re folisitsoe ke maqeba a Hae.” Na ho joalo? [Phutheho e re, “Amen.”—Mong.]

⁶⁹² Moetsalibe ofe le ofe ka mona, a ka ba teng, u pholositsoe ho tloha mohla Jesu a ne a eshoa. Empa u se ke ua shoela mona moo monyetla oa hao o beiloeng pel’*a hao*, ho kena ka pel’*a* Sefahleho sa Hae ebe hona u lekang ho E amohela. E etselitsoe

hona joale. U tlameha ho E amohela hona joale. Ha u ka tšeleta ka nq'ane ho Mali, ha u sa hhole u le letho haese... U se u ahlotsoe, hoba u ahloloa ka moo u ileng oa tšoara Pheko ea Morena Jesu Kreste. Ua bona? Uena, u se u ikahlotse mono.

⁶⁹³ “Athe O tetekiloe ka baka la makhopo a rōna, ’me re folisitsoe ka maqeba a Hae.” Ka baka leo, ha kea tšoara letho, ho u folisa ka lona. Kereke e ke ke ea tšoara letho, ho u folisa. Ntho e le ’ngoe eo re ka e rapellang ke ena, hore tumelo ea hao e se ke ea hboleha, hore hoseng hona u tle aletareng ho amohela Kreste e le Mofolisi oa hao, ka moo u entseng e le Mopholosi oa hao. Ha se ka letho... Molimo o etsa mehlolo. O hlahisa pontšo e kholo. Lifofu, litholo, limumu, ntho eohle, e folisoa hantle mona tabernakeleng. Empa leha e ka etsoa kapa che, rea E amohela, leha ho le joalo. Hangata lintho tseo li tlisoa ke lipono.

⁶⁹⁴ Ba neng ba etile koano Lisontaha tse ka bang tharo tse fetileng ba bakae, kapa tse ’ne, mohla ho keneng monna mona, e le sefov se shoeleng litho, kapa a lutse setulong mothapo o tsoile balanseng. Le pele ke tloha lapeng, ka mo bona ponong, “Ho tla fihla monna mono, ea moriri o lerootho, o pulufalang. Mohatsae ke mosali ea tšobotsi e ntle, a ka ba lilemo tse mashome a tšeletseng. O tla fihla a ntse a lla,” ’me o tla nkopa. “Le ho khutla ho rapella monna oa hae.” O ne a lutse hantle mono.

⁶⁹⁵ ’Me ka theoha. Ka bolella baena ba bang ba heso mona, “Shebang sena.”

⁶⁹⁶ Eareha re theohela aletareng, ba bang ba ne ba rapetse. Eitseha ha ke tloha ho ea rapela, ka tsamaea ka ntoo boea le ka mona. Eaba mohatsae o ema a etla hantle ka moo Morena a e boletseng. Batho ba ntse ba talimile, ho bona haeba e tla hlaha joalo. Ha eso hbolehe. ’Me eareha ha a tsamaea...

⁶⁹⁷ Ka ntano fumana, hore monna eo, Ngk. Ackerman, tlase koana Birdseye, Indiana, ke eèna ea mo rometseng holimo mona; ke Mokatolike, ’me moshanyana oa hae ke moprista mono monastering mane Saint Meinrad. ’Me Ngk. Ackerman ke motsoalle ea tsomang le ’na, eaba o romela monna eo holimo mona. Eaba Morena o mpontša a tla romeloa ke monna ea hloho e ntšo, ke mpa ke sa mo tsebe.

⁶⁹⁸ Ka re, “Na e ne e le Ngk. Ackerman eo?”

⁶⁹⁹ A re, “E ne e le eèna.” Ua bona? ’Me eaba monna eo...

⁷⁰⁰ Ka re, “HO RIALO MORENA.” Ka theoha. Ka re, “Monghali, ema.” A foulfetse a bile a sa khone... eèna... Keha e—e mothapo oa balanse o putlame. A sa khone ho ikemisa ka mokhoa oo. Ua bona? A se a phetse lilemo tlasa maemo ao, a kile a etela ba ha Mayo le bohle ka mathoko. ’Me eaba re mo rapella thapelo feela, eaba o a tsoha. Ke eo a tloha, a tsamaea a theoha.

⁷⁰¹ Pele a re, "Ha ke khone ho u bona." A ntoo hooeletsa, "E. Kea khona." Mahlo a hae ile a tutuboloha hona moo. Esale e le ramoetlo, mohatsae e le Mopresbeteriene.

⁷⁰² Batho ba bang ba nahana ho thoe "Mopresbeteriene ha a hooeletse, 'me ke Ramoetlo." Ea ka le ka be le ba utloile. Ehlide. Keha ba hoolelitse ba harelana ka liphaka. Eaba o khutla a lata setulo sa hae, a tsoa a theoha ka litepisi, joaloka monna ofe, a khona ho bona le ho bua le—le ho etsa lintho tse joalo.

⁷⁰³ Ho kene lengolo le tsoang ho eëna, kapa o letsitse, tsatsi le leng. Ke kholoa, Moena Cox a ne a mo etetse. Ha thoe, "Mahlo a hae a ne a chesa." Ruri. Ke mothapo, methapo ea pono e a hola e boela e phela, ua tseba, 'me e iphumanela malulo. Thohako e ne e tlositsoe.

⁷⁰⁴ Ha u ka lumella tlhaho ho itaola, ha tlhaho e sa khathatsoe ke letho, e tla—e tla phikoloha ka botlalo. Ha u tlamme sephaka sa hao ka leratsoana, u koalla phallo, qetellong letsoho la hao le tla shoa. Joale, hobane, ka tloaelo, e tla itokela ha u ka e tlohela e le joalo. Empa ntho e 'ngoe e sitisitse tlhaho. Hape, haeba u sa e bone, ha ho ka moo ngaka e ka e qhautsang. E ka sebetsa ka lintho tse peli feela: seo a ka se bonang, seo a ka se amang. A ka sebetsa ka mokhoa oo feela: seo a ka se bonang le seo a ka se amang.

⁷⁰⁵ Haeba a sa khone ho e bona, e tla ba ke ntho ea moea. Ntho e teng, e ka khonang, ho ka etsahala ntho e le 'ngoe feela; rea rapela, Kreste o suthisa thohako, ho leleka liabolosi, ebe e boela setloaeling, ho fola. Ho phekoloa, 'me ke phetho se leng teng. "Ka lebitso la ka ba tla leleka batemona." Ho joalo na? Ke tsepiso ho kereke. Ke tsepiso ea matla. Eng? Eona, ke Boteng ba Hae bo nang le rôna. Joale, ho re sitang ho haelloa ke phethetho hoseng hona, ho etsa lintho ka moo A sebelitseng, hoba re sa le kahare ho lesira. Ua bona? Empa a teng maikutlo a re joetsang, "Oh, e." Ua bona?

⁷⁰⁶ 'Me ha u amohela pholiso ea hao... Ho sa tsotelehe na lesira le reng, ke seo Lentsoe le se boletseng. Ua bona? Ke eona. Ke eona. 'Me kamehla e—e—e Lentsoe le okamela le laola ntho efe le efe. Lentsoe la Molimo la Bosafeleng!

⁷⁰⁷ Shebang Sara, popelo ea hae e ne e shoele, a le lilemo tse mashome a robong, a phela le mohatsae ho tloha a ka ba leshome le tselela kapa leshome le supa, bana ba le sieo; Abrahama, a le lekholo. Molimo oa khutla hantle oa ba fa lesea. Ua bona? Hobane, ba lumetse. Ba bitsitse lintho tse neng li le sieo, eka hoja li ne li le teng. Ako kene ka joalo hoseng hona, motsoalle.

⁷⁰⁸ 'Me bosiung bona, re lebeletse... Ha u le moeti oa rôna, re thabetsé ho ba le uena mona hoseng hona. Le Molimo a be le uena. 'Me ha u le kahara motse mantsiboea, re tla thabela

ho ba le uena mantsiboea ana tšebeletsong ena eohle, ea Melkisedeke. 'Me ha u sa khone, u ena le kereke ea hao, e-ea kerekeng ea hao. Seo—seo ke sebaka sa hao sa tšebetso. Ha u le setho sa kereke, u ee teng. Ena ke tabernakele e nyenyane feela moo re phuthehang kahare setsoalleng le e mong. Joale, Morena a le hlohonolofatse.

⁷⁰⁹ 'Me Khaitseli Gertie o tla re letsetsa, *Ngaka E Kholo E Fihlile Joale*. 'Me na o teng ea tlileng ho rapelloa mona? Phahamisa letsoho la hao, bao ba batlang ho kena moleng oa thapelo, ho bea tumelo ea lona ho Kreste. Ho lokile. Ha le ka thea mola ka lehlakoreng *lena* la kereke, ka kopo. 'Me ha ba ka hulela setulo tlase nakoana, moena, ka kopo, ba tle ba re hlekele sebaka ka mono ra fetisa batho. Tloong ka lehlakoreng *lena*.

⁷¹⁰ 'Me re tla rapela joale, re sa bina. 'Me ke tla kopa baholo mona, ba bolumeli bofe le bofe kapa kereke, ho sa tsottelehe na keng, ha u lumela pholiso ea Khalalelo, na u ka ema le 'na mona kalaneng ena, ho rapella bakuli? Re tla thabela ho ba 'moho le uena. Bolumeli bofe bo hlophiloeng, kapa leha e se bolumeli bo hlophiloeng, u ka bang eng, re tla thabela ho ba le uena 'moho. Na u ka tla joale, ho rapella, nyoloha ueme le 'na.

Moena Neville, ha u ka tla ka oli.



BUKA EA BAHEBERU

Melaetsa ena e leshome le motso o le mong ka Moena William Marrion Branham e reriloeng sethatong ka Senyesemane ho tloha ka Phato 21 ho haola ka Loetse 22, 1957, mane Tabernakele ea Branham, e Jeffersonville, Indiana, Amerika, e ntšitsoe mabanteng a likhatiso a makenete 'me e ngotsoe e sa khutsufatsoa ka Senyesemane. Phetolelo ena ea Sesotho sa Boroa e ngotsoe 'me e phatlalatsoa ke ba ha Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org